




五之七 奏議



雲隱堂文集卷之五

相州 張鏡心晦臣甫著 子潛編校

奏議五

彙叙勦平楚寇功次疏

兩廣總督臣張 謹題爲遵旨會勦楚寇巢穴蕩平泰寧再見謹
彙叙功次以祈聖鑒以昭鼓勵事崇禎十一年十月初三日據監
軍道廣東按察司按察使劉士禎呈詳據叅將施王政等監紀推
官關應春等各歷報功次到道該本道看得湖南之寇衆至數萬
其肆毒于楚者破城殺將不可殫記其流毒于鄰者合江南兩粵
無寧日焉卽奉旨會勦從春初以及于今主客兵亦旣言攻言戰
言撫言搗不遺餘力而圖之且數月於茲矣迨二源一破不二旬
渠穢巢傾外寨立燼底定旋收而各鎮班師此豈始圖之難而今

勦之易哉則以賊之根本盤據二源自嘉靖年間有大盜踞此官
兵不敢進攻卒以誘殲渠魁撫散餘黨而罷故今大賊首陳朝龍
李荆楚郭子奴輩聚精兵萬餘負險埋伏格我官兵蓋其狡計思
摧我精甲而後逸出耳賴本部院始終主緩外寨急攻本之說咨
沅咨虔爲搗巢之舉又竭力措餉不倚辦于鄰封不分畛于共濟
先發叅將施王政及督令楊奇琳兵三千餘任連爲專搗二源之
主兵又發林宏李相兵二千繇宜章過臨武雖有行村大捷而仍
合趨二源與副總兵徐之龍兵一千三百餘趨大橋南風岡等處
爲并力搗巢之協兵又委連州知州王立準軍前叅謀凡決機定
計無日不策萬全致諸將兵士感奮激烈亦皆桓桓赴赴志梟逆
賊如李相林宏一經羅源行村衝殺十餘陣擒斬共一千八十二
名顛而渠首劉先生窘迫潛遁雖獲于楚兵亦二將之鏖戰有以

視其魄而落其膽均與有力焉乃紫獠大鼓諸源之捷則叅將施
王政叅謀知州王立準之功爲首二人同心戮力矢志殲賊計其
潛賄賊親借用姦細與夫另募獍兵以備深入凡彼中虛實聚米
可譚先時購捕賊首黃舜仁圖畫形勝繼搗沙嶺崗透通聲息遂
合徐之龍兵直入大鼓源王簿崗踞險要而得建瓴之勢夫豈一
朝夕之故也迨林宏李相相繼並至左右夾攻其成犄角而林宏
兵爲鄭芝龍部下尤能突危冒險氣吞羣醜各將立志殺賊不貪
割級使奔聚紫源積賊一朝而擒斬者斬勢若破竹渠魁郭
子奴卽於八月初八日當陣立膏斧鑕至初十日則斬賊首李德
所十三日則斬賊首陳朝龍十四日則斬賊首曾孟卿十九日則
生擒賊首周龍宇二十二日又生擒賊首黃元甫並先擒賊首黃
時宇卽舜仁俱經審其妻子與破害難民及同黨賊首供認的確

計前後俘斬賊首共七名而生擒者則活口見存可質其餘孽從
共一千三百九十三名顆而銳死焚燒墜坑者無筭至監紀推官
關應春于大鋪寨之獲功擒賊首黃細雪則又本官往來楚地帶
有官兵各鼓敵愾隨在擒斬亦可見同仇誅暴之切也若賊首李
荆楚之獲使非粵兵深入直搗收縛其妻子令彼魂消神蕩幾何
一毛俊司官而能收漁人之利乎則雖擒自楚實粵之功居多也
本道于洗穴之後再三傳摻索之令故諸將窮掃力追殘孽爲之
一空矣是役也通前後共擒斬二千四百八十二名顆其銳砲焚
燒墜坑填谷不及取級者不計其數而知州王立準續報功次纍
纍但不與焉于是數年不破之窟一平而諸寨無根之蔓立斬而
四鎮不逾時奏凱而旋矣夫中原勦著一不審而禍延十年今茲
搗巢一撥本而難夷且夕向令無兩廣大兵萬餘誰有輕犯二源

之賊者恐不斬其根而披其蔓蔓難圖也此皆仰仗我皇上神武
布昭閣部科帷幄遠籌本部院各院折衝決策各將吏宜力用命
之所致也職又有感于實心任事者之苦焉二源之役楚初時料
理榔桂其于此益憂憂乎難之以爲巖峭穴邃深根固蒂我兵必
不能深入惟本部院矢志堅意日夜圖維各將吏更奮力同仇凡
巢中消息用間通透乃能一鼓掃滅實而按之高獠源則廣西與
楚共功也紫獠源大鼓源主簿尚則廣東全功也惟虔中不認仍
歸功于粵在徐嶺北道文移中鑿鑿可據且前楚西兵揭東粵兵
不候合擊見之爭牘一似以先時責粵者兵家呼吸刻不容緩安
能等待拘泥以調人情乎嗟嗟粵之所爲拔本塞源擒賊擒王計
者蓋亦至矣圖以半年用兵近萬費則不貲糧則自運粵東非無
事之地恐公道掩抑將士灰心不得不重言以明之非敢爲競也

等因又據廣西分守蒼梧監軍道右叅議唐顯悅呈詳據叅將成大用等監紀推官吳鼎元各歷報功次到道該本道看得湖南之寇惟高紫二源爲最巨有陳朝龍李荆楚亡命無賴嘯聚羣兇有曾介奴驍悍異常素號無敵周龍宇廖三慶郭子奴黃時宇等並稱魁首極狡極克攻城掠邑歲無虛日僭號蔑分公謀不軌真天誅所必加者也幸值皇上赫然震怒神武布昭閣部籌畫精詳遠燭萬里督撫按各院同心戮力決策無遺于是粵西將士人人踴躍用命爭以殺賊自効有六月二十二二十四兩日藍山之捷劄營甫定斬獲賊首李荆楚之次子李老夏賊渠黃利宇等七十五級生擒八名中鏢槍藥弩死者不計其數而源賊之膽落七月初八日撥勦大羅後砮諸山斬獲五級生擒十五名婦女十三口及七月十三日牛牯寨之捷斬獲七級生擒五名口房屋米穀積聚盡

行焚燬而犄角之巢空有七月二十五日秀峯兩頭等寨之捷出奇掩擊連焚數寨斬獲九十四級生擒十六名賊婦二十八口中鏢鎗弩及火焚者復六百餘而肘腋之黨清有七月二十八日林埠唐家坪之捷乘勝逐北斬獲七十九級生擒四名婦女六名口二次救回軍民男婦一百九十一名口而負嶠之路絕于是以八月初四日進搗高良源則各賊方倚山爲營窵斷峭壁徧地裝籠以制馬足不料西兵從兩山之巔分道並進連殺四陣攻破牛塘萬家庄牛角坑鴨漣崗冷水源梨樹坪等寨焚燬米穀無筭殺死千餘斬獲二百零三級而賊渠曾介奴廖三慶同時授首初五日窮追三分石香爐山榛木八仙下棋等處則盡焚其巢穴斬獲二百三十二級生擒八十六名口未及斬級者不可勝計而高源兎窟盡拔根株初八日會東沅贛兵合搗紫獠源則先破大村中村

雲隱堂文集 卷之五
水沙坑王簿崗次及紫獠又窮追拐塘雷浪嶺水沙衝大山連殺
數陣斬獲七百三十九級中銳箭鏢弩死者四百餘生擒賊屬三
十二名口賊渠周龍宇被殺其妻被擒而紫源釜魂悉歸蕩滅本
道仍嚴檄將士必期殲盡渠魁遂于十六日再撥三分石斬獲賊
首陳朝龍并從賊三十二級生擒四名婦女一口又冊報續擒二
十名而李荆楚黃時宇星夜潛逃亦被擒于毛俊司巡簡李采一
時遠近士民歡聲動地本道又料逋誅之寇必繇九龍壩零星逃
遁面商蔡叅將督兵截勦十八日果於三峯石後巖截斬一百二
十四級生擒五名而兩源渠從舉無瞧類矣至粵東徐副總施叅
將李叅將林遊擊各統勁師協力勦源屢戰屢捷擒斬渠從無筭
焚燬寮寨無數兩粵事同一體所有功級應聽各院查叙本道不
敢越俎此一役也用兵三千八百有奇抵藍已及三月攻破大小

源崗三十餘處燒燬賊寮三千餘間斬獲一千六百九十餘級生
擒二百四十餘名口銳炮焚燬墮崖跌澗不及找級者亡慮數倍
救回難民五百有奇此五百人者皆屬將士恪體好生德意而不
敢殺良者也此皆仰仗本部院各院運籌發縱各將吏宣猷効力
之所致也等因到臣該臣會同巡撫廣西地方都察院右副都御
史林贊巡按廣東監察御史葛徵奇巡按廣西監察御史陳昂虞
看得楚寇四突大江以南皆震焉數殞名城載驚親藩岌岌爲中
原續幸皇上赫濯厥靈師興四省令懸主客必欲立奏蕩平臣粵
以剝膚之患奉命搗巢始終以二源爲主故五月初二日東將施
王政統兵駐連州扼二源咽喉六月初六日西將成大用統兵赴
藍山制二源肩背其圖之三月而發之持滿者原非敢輕易從事
也七月初九日林宏李相行村之戰冒險深入不暇返顧一斬千

餘功六七等月二十四五等日成大用李茂栢力掃外寨不遺餘力屢捷數百級皆真實用命戰伐高于一時而臣意不存也隨再檄成大用兵入源再發徐之龍林宏李相兵入源誠以二源從來不破之巨窟而今日李荆楚郭子奴曾介奴等大家盤據非大舉不克非一克而賊終不靖也幸沅臣發貢王敵兵同成大用抵寧溪自七月二十七日起破沙子嶺破大鼓源破王簿崗則大橋一路施王政徐之龍也自七月二十九日起破林埠冷水源破高獠源則寧溪所一路成大用貢王敵也自七月二十九日起破羅家崗繇大麻崗而進則南風凹一路李相林宏也諸將心同賊衆氣阻高獠源王簿崗賊首盡聚紫獠源築柵恃險出死力以角拒我兵誠勝敗相持之地也原約初九日合攻偶因連兵與林宏兵攀藤舉火賊衆開壘來衝東兵遂乘風火之勢爲縱擊之舉不逾時

而傾巢卵覆斬獲與奔潰相半而賊破矣雖各將有背約端功之揭其實決機呼吸間未可爲罪也三方犄角一舉成功初九日以後追斬無遺渠從盡淨不致逋匿以作燃灰誠快舉也是役也東粵戰兵合狼兵猺兵共七千餘西粵戰兵合土狼兵共三千餘可謂竭全力以制大巢始能成此克捷也斬首四千餘級鏡炮傷落溝澗者數千生擒救回者不計不出月餘寇定師班臣已三疏具聞至魁渠之獲如郭子奴曾介奴其駢首高紫二源之戰者也李荆楚妻妾子女金銀當獲之巢中而子身走脫旋被巡簡緝獲者也嗣後擒斬纍纍皆破巢後半從林中捕緝而報有偶同則人懷逐鹿之心各誇擒王之績但求真賊駢首不必功自誰出者也卽東粵毘後生擒有名大賊首張師父黃元甫陳容和等各道歷審在案然臣亦僅爲地方慶清夷而不敢侈功誠謂大巢不破如虎

在嶠誰敢問之巢覆潛通訪而緝之亦一夫之力耳然各路將心力之齊蕩寇成功之速誠未有如今日之盛事者也皆賴我皇上靈威誕敷再見常武之師無煩三年之克閣部科臣政肅令明運籌禁中央勝闡外廣西撫臣林贊沆略一絲不漏壯猷屢捷必先偏沅撫臣陳睿謨運獨握于居中合羣策而畢舉爰以公忠用成駿烈南贛撫臣王之良殫攻守之苦心成蕩平之偉奏江西撫臣解學龍平妖已奏內寧遣將並施外攘廣東按臣葛徵奇謀成樽俎之間氣作風雲之壯廣西按臣陳昺虞馳汗馬于湖南收鴻功于指顧湖廣按臣林銘球發令確如金石揚威迅比雷霆江西按臣邢紹德決策坐擒妖首餘威遠震荆南廣西撫臣陳昺虞當舊撫謝事時躬破全州之寇當四撫合勦時又親臨永州之師臣等歎爲不可及也若行間奏功在廣東文臣則監軍道劉士禎出入

戎馬之中拮据兵食之際清真任事危苦不辭撫猥料敵始終勦寇之功皆其功也宜擢節鉞以勵勞臣叅謀知州王立準馭猥得力相地披圖指示兵將皆賴其力若諸猥袒賊無今日之功在沅臣初題疏可按此才智之功先于征戰也監紀推官關應春一味朴誠不避嶮怨紀績平明而部丁擒斬至百餘是可嘉也武臣則叅將施王政謀寇數月發機一旦出奇制勝爲各路領袖繇地利賊情先得成噐于胸中故戰功與渠功並茂署遊擊林宏每戰必先無堅不破破源時不貪級以失機遂當先而陷陣血戰之功一時表表副總兵徐之龍到行間最後破大巢獨先擒李荆楚全家而俘斬功與施王政相頡頏原任叅將李相才氣沉練卒伍歸心隨地建功以俘馘奏績督令都司楊奇琳糾合兵將斬怯破賊以申明紀律奏績潮漳副總兵鄭芝龍聞命整兵立刻就道據其二

千驍銳于九月杪已達廣州且自損貲數千金另領家健數百人
有吞寇滅賊之氣雖未得展所長而部將林宏始終俘斬八百八
十餘級並破巢搗斬未及割級者四百功皆鄭芝龍節制訓練之
兵似應一體從優叙錄以光調勦之綸以作勤王之氣者也若守
備把總黎樹績陳邦對余應球鄭方葉岐高王廷弼羅朝聘林應
葵曾華盧國英高文廣劉守志麥壯猷李承欽張牙李良臣李鳳
吳勝黃廷沈怡巖國用徐暹哨官施奇哲王三王貴丘富丘貴謝
昌國葉茂廖宗葉錦史大耀黃悅京羅秀湯起龍楊應鍾順正黃
光輝何維新唐能一或賈勇先登舉旗陷陣或冒險破巢乘勝逐
北皆齊心協力以臻蕩平而王三雄勇敢戰每陣大呼陷敵與施
奇哲手斬元兇更當表出優叙以作行伍之傑者也在廣西文臣
則監軍道唐顯悅實心壯略慷慨臨戎深入楚中四閱月歷盡艱

危卒使戰守功高一隙不疎軍旅之才堪當節鉞監紀推官吳昇
元叅謀決策執訊獲醜衆其服其公明武臣則叅將成大用思信
素孚智勇兼著枕戈半載向敵無前外寨高獠源之功冠冕荆南
總兵坐營都司李茂栢每戰身先擒斬之功著于當陣永寧叅將
蔡弘毅扼要揆擒防守之功著于一面功當並叙若摧鋒陷陣如
狼目千總陳威肅法現土舍廖養石道貴羅管林傳通覃龍保廖
奇肅文峩肅文廣等並應優叙肅法現勇技絕倫目無勅敵更表
出另叙以作壯士之顏者也至湖廣監軍道李嵩妙寬猛于兼施
成攻守之並用四省兵將隻手控持南贛監軍道徐人龍破撫持
議如山掃穴籌兵似電克建茂功足膺名鉞衡州監紀通判郭九
有才鞭風霆功著沅楚偏沅叅將貢王猷等南贛遊擊謝志良等
皆桓桓赴赴一時相資于隅並効犄角應聽各省撫臣彙叙者也

若共事宜力在廣東文臣則左布政使姜一洪當餉詘之時佐軍
興之費與臣嘔心擘畫凡器藥半歸設處卽涓滴必効公家遂使
數千兵行月二糧不煩籲請而克濟緩急鴻功偉畧未可以等夷
論也嶺西分巡道陶崇道徵發應手如流組練隨心曲當嶺南分
守道陳之美清真宜民宜人鎮定不絀不兢羅定兵備道鄒嘉生
善守固西山之圍轄兵贊南楚之功巡視海道劉柱國淵敵厝本
根于底定威望奠澳海以安瀾韶州府知府熊士達有拮据徵發
之功南雄府知府吳之京有輸運犒餉之勞肇慶府知府蔡秋卿
廣州府知府余自怡有繕器械給魚米之勞廣西梧州府知府袁
文新有征調狼兵之勞廣西南寧府知府吳紹志有買辦馬匹之
勞肇慶府通判唐之相韶州府通判趙之球推官許燦廣州府推
官孫襄高要縣丁憂知縣張源思南海縣知縣蔣彞番禺縣知縣

謝泰宗東莞縣知縣汪運光香山縣知縣毛毓祥清遠縣知縣胡
開文曲江縣知縣潘復敏乳源縣知縣蔣明鳳英德縣知縣吳永
澄保昌縣知縣黃中雅仁化縣知縣費映環連山縣知縣余懋儼
陽山縣知縣李子章翁源縣知縣朱景運三水縣知縣高其昌新
安縣知縣彭允年從化縣知縣蔣朝陽或轉輓給軍以資騰距或
除戎擲噐以壯聲威而乳源以彈丸之地巨露處郊外有三月知
縣蔣明鳳竭蹶供轉運之煩嘔心佐兵食之計其勞更著均應彙
叙內知府蔡秋卿處臣鎮下不獨征兵繕噐盡賴綱紀而消萌定
變與有功焉通判唐之相司賞嚴明大作貔貅之氣趙之球督餉
連陽罔愛髮膚之勞推官孫襄長才定識覈軍實查兵餉凡出入
支扣嚴冒濫而清計會大有功于軍旅許燦當衆人裹足之日請
署樂昌兼督北路糧餉卒之防守無虞飛輓攸賴至廣東多盜之

區大兵出外奸宄生心高要縣知縣張源思才力兼人凡臣征兵製藥造鏡繕甲及一切水陸糧餉供應接濟皆出其手西省木馬船手陰謀劫掠本官先事發覺不大聲色而定之南海縣知縣蔣柔密擒邪教妖目鍾貴修等獲有妖批勅印與各處交通名籍遂按治如法徒黨解散不爲江右之續香山縣知縣毛毓祥峻品長才佐海道定澳燹殺兵之案皆曲突徙薪大有裨于安攘者不敢不一拈出掌印都司王化行中軍都司馮其源或奠內海以無虞或佐行間之一臂旗鼓都司區成勸候任旗鼓管賞功所事何兆寧或効傳宣之用或資醪續之恩練兵都司雷大壯何吾疑守備葉正芳或分隊各嚴防練或半夜傳檄軍中出入鋒鏑脩經薪膽南韶都司管守備周一誠聽用守備胡忠羅蓬思成之度指揮嚴耀宗王綬管塘把總蘇名彰范奎陳王英李景清翟奇貞戴衝等

或提水陸之兵或任善後之責或理塘報或繕火藥或治銃噐或馭狼兵皆當一體並叙者也在廣西文臣則左布政使涂紹燧措餉如流凱功旋奏大有裨于飽騰者功在轉輸首從優叙桂林巡道顧國縉驛道程世培左江道張一鳳府江道謝宗堵禦克嚴一路置郵不爽軍機原任桂林府朱之玉南寧府知府吳紹志梧州府知府袁文新通判鄧來麟陳懋學推官徐登瀛全州知州朱嘗便臨桂縣知縣葉可緇平樂府署印推官曾美同知施堯明原任通判門應召署賀縣知縣楊洪功富川縣知縣黃世耀恭城縣知縣羅國佐靈川縣知縣程克武或增兵防守或措處噐械或分理糧餉船隻或捐貲犒士均不可泯者也武臣則掌印都司周懋勳柳慶參將李棟僉書范汝膠守備華斌李文燦坐營王輔皆効力防勦雖功次于戰伐而地方賴之所應並叙者也若廣東効勞吏

雲隱堂文集 卷之五
日程維寔倉大使葉廷琮等千戶張勝鉉等廣西管操典史張羽宸等千總陳國威等已經監軍詳開臣不再贅旣各効勞並應賞激者也若陣亡把總陸相王弘余賢哨官禡華鄒維熊黃勝龍捕盜隊兵林台等八十二名同前功冊一併開明候核仍應錄卹以慰忠 事抑臣再有請焉戰用將士之命者也語云武將不惜死夫惟不惜死而功乃成耳三月寇犯韶州遊擊張開祚一戰斬級二百既保名城無恙旋以突戰被亡卽臣調度之責不敢辭而以視他省寇犯破城殺將兼之者似畧有間難謂戰功可混所當查前陣亡張開祚陳邦基等一併從優贈卹以鼓將來忠義者也除兩粵監軍道覈報功次冊該臣繹部查核外伏祈聖明勅下兵部覆議分別叙賚庶將吏鼓舞而封疆之定功保泰永有賴矣謹題請旨崇禎十一年十月初六日題十二月二十九日奉 旨該部

核議具奏

核報守將功過以昭勸懲疏

題爲微臣提兵遠出謹報守將功過以昭勸懲以責成功事臣念粵中山海鬱糾盜賊出沒征楚之役大兵外移恐姦宄生心凡要害之地如近而裏海寇雜蜃戶遠而高雷地按廣西再遠而潮州界連汀漳皆負山傍海四路將各統兵二千餘彈壓其間者臣于四處不調一兵不檄一弁三令五甲告以振旅消萌誠圖內寧而後外威也幸署裏海都司王化行風餐水宿撫蜃安民勒盜就弭省會安枕雷廉叅將吳宣猷親督部兵會捕西寇使石城劫賊駢首就戮電白叅將楊文炳先事思防不動聲色用守備張上位將三省盜魁曹子義爲前督臣熊文燦懸三百金購之不獲者一朝就擒此皆克副臣令以貽一路之安者也獨潮州叅將王尙賢握

兵二千安坐數月未事不能消弭臨賊不能驅勦臣八月間督剿楚寇據惠潮兵巡道邵名世據署府事推官王鼎鉉報八月初八日流賊數百流突揭陽縣竹橋地方縣官張明弼率典史陶鴻翊追剿被賊將典史殺死並傷鄉官劄委弁鄭祖紹其縣官身中一箭刦掠竹橋甚慘等情到臣而該叅高坐郡城不出也臣檄責之續又據該道報把總余師吉哨官林明英領兵百餘追賊山中互有殺傷余師吉林明英亦被傷等情到臣乳源去潮二千七百餘里憂心如焚一面查失事情形一面檄該叅親剿以爲必能奮袂救過矣直至九月十六日該道委鄭芝龍部弁李明追賊報功與鄉兵擒獲者數十人僅屬零捷而該叅仍高坐郡城不出也投臣一稟云部兵二千餘分守信地卑職營兵僅三百揭陽去郡城二百餘里任守郡城重地道委李明進剿詎意遷延時日致賊東遁

西逃而竟不自言發兵之期進剿之策悠悠若局外人矣嗟嗟兵各有信不可調耶賊至殺官傷弁流刦境內二旬可委爲鄉兵之責耶旣稱揭陽去潮州二百里原屬小寇竊發又何庸路將守城耶不知臣始之不調潮兵後之再三申飭本官料理何事耶此非臣之寬文責武也縣官帶傷典史陣殞據賊聲勢披猖則路將之任耳除臣嚴檄該道督府縣官嚴保甲緝姦宄補過圖功又柘林寨守備林宏惠州叅將施王政各率勝兵歸剿但該叅平日全無隄備見寇一味逗遛法應懲治念剿寇之時寬使過之令所當降罰戴罪剿賊自贖者也臣繕疏將畢又接該道報福建詔安流賊突發劄王壽山逼近饒平等縣總之潮漳接壤同山共海寇聚其中入潮則報閩寇入漳則報粵寇臣面飭鄭芝龍領征楚兵二千遴還掃蕩自當痛加薙夷以靖地方埃另疏具報外謹會同巡撫

南贛汀韶等處地方都察院右僉都御史王之良巡按廣東監察御史葛徵奇具題伏乞勅下兵部覆議將王化行等分別勸懲庶路將不敢偷安而成功可責矣謹題請旨崇禎十一年十月初九日題十一月十九日奉 旨該部核議具奏

直糾通澳巨貪疏

題爲直糾通竊納賄巨貪以明漢體以維官箴以肅竊防事照得澳竊泡寄海濱仰命中國原無異志直貪官竊攬蠹胥三者相倚爲姦詐騙財貨勾連出入以致竊人輕侮中國藐不畏明今年三月二十九日澳竊因哨兵盜姦竊婦誤殺哨官何若龍等臣謂屬竊擅殺漸豈可長檄道將一面訪究開釁哨兵一面嚴諭澳竊縛克正罪隨據署海道事嶺西兵巡道右布政使陶崇道奉牌宣諭間即取有澳竊願縛罪出獻結狀報臣謂可且久結局不意海道

中軍守備吳維憲內結書辦羅秉謙萬門子外結姦攬吳萬和吳培宇往來澳中騙竊目噉嚼呶呢吧嘮唱噉等包管打點詐竊銀五十二箱及琥珀合油等物招搖狼籍計與延脫遂致竊人反覆觀望不行獻罪白晝攫金通國鼎沸歷四五月竊人背約狂肆日甚一日時新道臣劉柱國蒞任鐵面冰心認真執法始得從頭收拾臣隨檄拏姦攬吳萬和吳培宇該道亦拏書辦羅秉謙萬門子置之獄臣又會同按臣葛徵奇牌行該道內開照得澳爲天朝豢養身負重罪念其悔罪縛克自供就法業經署印嶺西道取有竊狀甘結姑與寬政乃該竊一憑姦攬蠹弁吞騙金錢遂妄意打點有靈遊魂可貸限逾三月法不再寬應正內地姦貪并問狡竊罪狀爲此牌仰本道官吏嚴行諭示限本月內獻出真正罪竊姑免窮治倘仍前窺瞰狡脫該道先將賣法近姦表裏相依肆行

貪墜爲通國之沸騰美澳彞之線索者立解赴軍門正法該彞聽
一面奏聞一面問罪貫盈么醜自有制其死命者該道身膺重責
萬難委卸當念漢彞體統攸關全粵利害倚伏國法公論誰能爲
事內解免者慎勿姑息縱容等因去後隨據該道稟稱仍用維憲
諭示澳彞蓋以前局貪聲播揚少知自好者避不肯往姑用以觀
後効隨于八月十四日據巡視海道副使劉柱國呈稱本年八月初
八日准香山寨手本移據管澳備倭把總黎建績巡緝把總何
喬棟赴職稟稱本月初四日奉海道差官兵維憲面交澳彞呈詞
五張著建績等繳報轉繳理合稟報連遞繳濠鏡澳議事亭彞目
陵嚟等通事林德呈詞五張俱爲遵依捉獲克犯以彰天朝國
法事稱澳彞素尊天朝國法豈有殺傷官兵之理及細查乃係澳
中逃出賊彞已經捉獲正犯陸名駕船水手二十名唆等同中軍

官解赴香山縣但恐入省又遭姦棍擾害毀謗上司難以結案伏
乞作主懇請本道駕臨香山定案結局庶彞商得上省貿易舉彞
沾恩等情其詞五紙職恐未的隨即差人帖約兵中軍前來面稱
澳彞獻犯情真所據彞詞合就繳報又據中軍守備吳維憲呈報
同前情到道轉報到臣當批據詳該彞縛獻罪人姑從寬政但其
惴惴入省姦人擾害不知漢法嚴明且該道拏姦禁擾令紀肅然
誰敢犯者仰道牌諭赴審速結以釋彞商勿得再滋觀望取罪去
後九月初六日又據該道呈稱案照先奉兩院批行本道責令該
澳彞目將殺官克犯縛獻正法屢經嚴催隨據香山寨叅將楊元
中軍守備吳維憲報稱彞目陵嚟等赴見自願立限本月二十
八日獻解審究卑職維憲到澳會同在澳提調備倭巡緝官與集
兵頭彞目責限縛獻就據彞目陵嚟等通事林德縛獻克犯具

列氏安屯年兵番敵奴黑奴牙匏奴戎文氏六名并報出水手二十名番哨船一隻大鏡五門鳩鏡七門並藥彈紅旗到道該本道查看得澳彞殺兵雖弁髦漢法而究所繇來皆汎兵先爲無禮閩棍後復播弄日延一日幾于中國之令格而不行矣經奉兩院批行縛獻兇手本道嚴督中軍併提調澳官再三諭以利害曉以法紀宣朝廷之威德禁姦棍之煽惑而後各彞悔悟始將兇犯六名繫縛俾水手二十名駕船獻解此非仰藉威靈何以有此除將六犯收監水手二十名召保聽候憲批發審外擬合詳報等因到臣隨批該彞細獻兇犯報解水手並一切船隻兇仗既伏漢法姑將羈彞釋放仰該道如法究擬速報同日又據該道呈爲奸弁指官誑彞事照得澳彞殺兵已將兇手六名獻解到省當于公所受兇釋質示威示信隨具文詳憲矣惟是澳爲金錢之藪結澳案者須

先防蕙苴之疑此案自嶺西道陶布政委曲調停慨認了局本道私幸可免覆餗已而兇手不出文卷仍移本道蒙憲臺暨按院責職祇承不敢推諉幸席始事之謀稍正獻俘之體先時正恐別委他官往提澳中又多一番騷擾是以仍遣中軍吳維憲齎牌往諭然而播弄之巨棍與指誑之神奸固未敢一刻弛防也自奉委以來四路差役密訪而省會濠鏡尤處處不時密緝前月差役從澳地訪報云兇犯將獻正在議處公費職大槩已得其根株矣及彞犯已到隨密地遍訪于會城內外覺指稱本道誑詐彞財確有實據因于本月初四日黎明喚南海縣典史同本道巡捕等官跟隨出城陽云他往公幹而陰令舟人鼓棹徑向中軍吳維憲所坐哨船時該弁不在本船因呼捕盜王富過船詰之富錯愕驚惶莫知所措荅云彞銀實有在船者職隨親詣其船招南海蔣知縣眼同

起銀則銀條一十五隻儼然出諸船中與所訪隻數無異也當問王富此銀從何得來對云從澳中搬送上船者第不知作何使用職隨諭蔣知縣將前銀擡至東察院啓篋驗對本道卽還本署而該弁隨亦來謁叩以此銀從來則曰彝人之備贖緩者也本道詰之曰卽備贖緩亦不過數百金耳如許之多何故則又遁其詞云是彝人托買紬緞者也本道叱之曰該弁係欽授中軍非商非攬而借口爲彝買貨以掩飾指稱將通彝接濟之罪又安所逃哉且質畱一十四彝雖經釋放船尙灣泊省河銀果彝人之有何以不在彝船而乃在中軍之船也而維憲亦舌咋而不能答有俛首懇從寬政而已矣總之此十五隻之銀先訪于澳內則科派于澳者云以酌本道及訪于省城則該弁屢于船上語其守者曰此係海道什物好生看管耳屬于垣該弁何不念之也所幸質彝尙在省

河前銀猶未搬入私室耳若各彝早去則穢名自本道當之而誰騙任該弁售之矣斯則關本道名節者固非小而其示彝以官方之玷使彝人輕我中國而威信漸不申于外彝所關於封疆不更大哉今據南海縣驗兌共計銀一萬四千九百四十二兩三錢內酌將三百兩爲緝探者克賞鼓勵候憲臺裁奪外實計一萬四千六百四十二兩三錢俱係番銀據南海縣當堂喚銀匠估照市舶餉銀例傾瀉足大錠每百兩連耗計銷拆二十一兩共該紋銀一萬一千五百六十七兩四錢一分七釐現貯南海縣庫該弁屬在命官本道本不敢擅逮而真贓纍纍抑又不敢擅縱已羈候按察司監謹具詳申報至其銀之傾瀉與否作何支銷弁之褫處與否作何究擬統候憲批詳示施行其質彝一面差官立押出海并以附聞等因到臣隨批澳彝殺官一事乃漢體所關本部院以三尺

繩之三令五申以嚴騙詐蚤慮及此矣貪人反居爲奇貨吞詐公
行賄賂張著使彝人反覆觀望四月不結輿論沸騰卽本部院聞
之幾爲驚咤不圖該道清嚴執法彝人俛首伏辜中軍吳維憲尙
敢逞其故智指索如許金錢當經收獲質對明白真無日無天之
事而從前賍私情態一盤捧出仰該道將吳維憲先行羈禁賍銀
貯庫候題叅行繳去後該臣會同巡按廣東監察御史葛徵奇看
得中國控馭海彝有法有體惟在出以公廉始可懾服犬羊而制
其跳動不意粵中貪官猾胥以外彝爲奇貨每有一番蠢動卽有
一番吞騙如去年紅彝之事醜聲播騰尙未結局而吳維憲之賍
又見告矣維憲以欽授中軍任緝防之責身爲谿壑貪比豺狼內
結道書羅秉謙萬門子外連姦攬吳萬和吳培宇乘澳彝擅殺官
兵橫行詐索騙彝銀五十二箱烹分打點遂使輸罪之彝因之中

變延至四月餘驕肆漸著岌岌乎綱維之裂矣幸新道臣劉柱國
清嚴執法奉臣牌拏奸攬貪胥立置之法而彝始聞而心折縛罪
彝六人番哨二十名以獻而維憲又復逞其故智指各使費騙彝
銀一十五箱嗟嗟罪彝獻矣尙割金錢巨萬彝何嘗不畏漢官哉
只漢官如此貪汙如此苟且何以令彝人何以存漢體向非該道
一塵不染淵深有謀從容緝獲則此一萬五千公然飽狐兔以辱
清朝彝卽駢首漢法有死不服臣之所以撫膺而浩嘆者也又據
該司道詳報單開吳維憲賍款纍纍不下數萬金此一弁者智工
狐假惡比鴟張句腹心羽翼而痛飲貪泉作賄賂招搖以大壞戎
索賍之獲賄者旣確款之證告者復明若不重法繩之將外彝視
中國爲弁髦而吏治邊防決裂且盡矣所當革職拏問追已未獲
金錢數萬兩以仰助邊餉者也至新任海道副使劉柱國認真執

法發覺賍私七萬餘金應與紀錄優異以風吏治者伏惟皇上勅下該部查議如果臣言不謬將兵維憲從重追擬劉柱國特行紀錄庶激揚有賴而外彛仰國法之森嚴矣謹題請旨崇禎十一年九月十六日題十二年正月初五日奉 旨該部知道

舉劾防汛將領疏

題爲遵例舉劾防汛將領以昭勸懲事查先准兵部咨該本道題奉欽依以後沿海督撫等官每遇兩汛完日逐一體訪查照九邊事例于歲終將大小將領分別臧否如其果賢從公議留如其不肖據法議斥如其人地不相宜不妨議調等因備咨前來通行遵照在案今照崇禎十年汛事已畢行據廣東布按二司守巡各道開送海防大小將領賢否支冊到臣謹會同巡按廣東監察御史葛徵奇據實爲皇上陳之除新任鎮守廣東總兵都督僉事許

自強氣骨沉涵精神洞達有潛地潛淵之畧以不競不絀出之叩其借筋數言藏胷萬甲允爲三吳夙望可稱百粵長城矣原任白鴿寨把總今陞南京右營坐營都司黃道吉惠洽投醪義形擊楫嶺海雙城著績陪京半壁馳聲原任白沙寨把總今陞江西都司掌印丘上儀榜列高名伍推廉將舊績素推東粵新猷移展西江原任柘林守備加銜都司僉書胡美勇畧出衆秘畫驚人練上而超距爭先應務則咄嗟立辦通才槩任水戰偏優以上或新任或陞任或隨征遵例不敢槩叙外看得漳潮副總兵帶俸右都督今削府銜圖功自贖鄭芝龍才驅雷電氣奮風雲謀克制敵威克摧堅恩克綏士一段忠肝俠骨誓圖報國年來殲寇攘彘殊勲屢著信當于古名將中求之卽今鯨鯢屏逝而瀚海不波伊誰力也管西山叅將事副總兵徐之龍規模磊落氣岸軒昂借攝鎮務綢繆

根本之地銷弭紅澳之間諸將稟承約束惟謹登壇之選屈指首
推惠州叅將施王政其氣樸質其才淵沉威濟以廉覺一軍有不
可犯之色方其下龍川橫柵指顧間而壁壘已改觀矣現借勦寇
連陽可任金湯一面管陽電叅將事副總兵楊文炳立勲黔屬作
楫嶺南敦說不墜家聲慷慨堪稱國士三月霞崗之捷擒斬六十
餘寇于是一方安枕而海汎謐如洵智勇兼擅者管廣州海防叅
將事副總兵黎延慶謀勇俱長忠貞代篤有運臂使指之神有應
變出奇之畧據其相嶮布兵先機扼要化驕卒爲帖服殆威惠克
全者耶瓊崖叅將湯允文才猷敏練器量沉雄一以安靜鎮密行
所無事裘帶不藉金刀解辦盡收瓊海卓哉保障潮州叅將王尙
賢力堪禦侮氣足折衝坐擁全潮爲建威消萌之舉一路資其彈
壓雷廉叅將吳宣猷深沉之氣精敏之才借攝裏海羣盜風清籌

嶮隘如列舂履波濤如平地雷陽得抱桴而臥矣澗洲遊擊趙千
駟才猷揮霍智慮周詳且自持嚴密談笑具有吞賊之志縱橫不
徒讀文之書西南之浪不驚走鷺之姦克戢其功也廣東都司掌
印王化行操守謹嚴精神振發氣如橫秋之鶚威行遯海之鯢據
其澹背誓忠矢心報國自負盡瘁不辭者東粵干城爲首屈一指
管柘林守備事都司僉書林宏才勇雙優初謂水戰是其長技耳
比試之征山復然且紀律嚴明秋毫無犯血戰比烈陔晴忠猷建
威指掌未易才也廣東都司僉書孫昌祚襟期恬雅志氣從容馭
下有紀而急公自効允宜克壯之猷矣兩廣坐營都司馮其源丰
格暇整氣宇安閒才情以磨練漸堅膂力在經營方壯干振良選
也原任廣海守備今改管南韶守備事都司僉書周一誠鷹揚標
格犀利才華殲寇竚望殊勲防海歷多勤績東山守備陳良弼膽

畧艱難不避韜鈴操縱咸宜天堂之捷縛真盜三十人厥績丕著
頃攝兩山覺壁壘氣嚴萑苻警息其桓桓赳赳者歟海北兵巡道
中軍守備葉正芳貫蝨擅僕姑之夜月摧鋒馳矯鸚于秋風實心
實事或謂馭下過嚴者而廉謹自持自可白于卒伍絕無弁流套
習樂安守備陳瑚氣颯馳而電掣才方矩以圓規陣諸八門波恬
兩汎尚惜其函鼎烹雞可謂惟楚有材粵實用之矣兩廣旗鼓都
司僉書區成勳才情練達見地明通操持凜捧玉之心處事嚴集
木之懼無媿兔且之選總兵標下遊擊管坐營事樂嗣功家起洪
都武繩昌國其爰練之才不辭歷嶮可紀成勞連平守備宋克猷
赤膽克徵慕義白徒新集知方肇造巖疆茲焉式固管南澳中軍
哨把總歐奇擒渠帥于水戰制狡獪以火攻足稱海上干城嶺西
兵巡道中軍守備朱德先氣壯貔貅之槩令嚴刁斗之明足任驅

策海南兵巡道中軍守備章如源撫循不怠馳驟多能慷慨前期
不當以紈袴目之管廣海右部分總守備馮燿售穿楊之三天備
細柳之一班管潮州標營把總事守備李明智能濟勇慎以服勤
列戟之良也雙魚把總戴惟節武畧夙嫻防汎加密才堪達到聽
用中軍守備管賞功所事何北寧明練出以沉雄謀敵一歸真實
自爾矯矯出羣羅定標營部選把總鄭宇斌鼓銳志于韜鈴作孤
城之保障碣石衛指揮實授都司僉書雷大壯任事廉能並著臨
戎智勇兼資肇慶衛指揮劉賜吉任事有才有智籌兵克壯克臧
南澳廣營守備成之度義憤目無勅敵氣雄身任干城肇慶衛指
揮蘇萬邦雄資指顧風生雅操冰霜氣肅肇慶衛指揮管總巡事
王綬奮袂赳赳好仇躍馬桓桓壯志羅定道中軍陳諮傳宣謀力
交資練訓嚴寬並濟清遠衛指揮嚴耀宗蟠胷不乏五花應手能

穿百葉肇慶衛指揮郭應崑膂力方剛才能克辦廣州衛指揮張九穗卹士有恩臨兵克壯管肇標把總守備黎樹積火攻變幻風雲勝畧飛揚虎豹標下把總陳王英冶銃器具靈通之材精火攻擅變通之技標營把總施鳳士卒用命同心盜賊聞風落膽管標營把總守備曾華有入穴擒虎之膽具乘風破浪之才標營把總徐時化精神機警才具優長下西把總李人龍巡海屢著奇勲緝盜能清巨窟標下水哨把總劉奠邦小心集事約已馭兵下中把總李承錫威惠浹于蠻民救寧著夫裏海廣營把總署守備周國祥敵爲明練技擊精通以上武臣或宣勞海上或著績行間長材亟拔一技必收皆臣歷試于風波盤錯之中以功次爲低昂者所當薦揚以備擢用者也訪得香山寨叅將楊元職掌全虧操持不簡一本官占跟隨員役共三十二名每名每月計虛冒糧銀入錢

一該寨部下把總每名內有掛名工匠或五名十名不等皆係本官侵冒一本官本年正月十七日差旗牌官譚成督徐有光哨船捉獲伍瑞臺私澳四櫓艇一隻受銀二百兩縱令有光等買脫不解一該寨地近澳彝本官防禦不嚴在例彝鬼婦女每年三月出在十字門雞嘴洲等處遊青宿山因先有一遊奕哨在雞嘴洲割水各兵看見彝婦二三人山容易捉姦遂奔捉下船行姦後揚帆遠去鬼奴奔報彝鬼卽帶番哨巡緝時遇哨官何若龍巡海亦至彼處彝鬼錯認捉姦之船遂放銃持刀將若龍等殺死屢行牌查姦彝婦哨官庇獲不報始而縱兵終而庇姦成何將紀現在提究一本官于本年三月二十九日束兵不嚴致汛兵調戲彝婦激彝人殺死官兵後通澳驚慌彝目四人親到叅府憑通事蔡翌宇跪送銀錢賄買不申有謂其得銀二千兩者有謂其得銀一千兩

者後因被殺哨官何若龍家屬鬻關幾于激變不得已于四月初旬方出申文解釋本寨哨官高文證一本官在寨每縱番哨船出海般運接濟私貨每一船出一次必先赴叅府送銀錢一百文方給與印票濠鏡澳通事蔡昱宇過交番哨主林孫通據有叅府票證一本官每撥哨船送攬頭劉汝完等裝載彝人銀到省每百兩索載送銀四錢一在回約計銀百餘兩澳內私貨店窩鄭珍海等交證一本官軍令廢弛往往縱兵接濟本年七月十六日捕盜郭昌領公文到省投遞卽藉隙包攬私米公然般運上船出海本道聽用哨官鄒龍等拏獲將郭昌收監候番現今申報究治未結此一弁者職馭澳藝豚澳藝爲奇貨法嚴接濟通接濟爲貓鼠紀律踈縱任哨兵姦姦起釁庇護不咎憑道臣提藝正罪袖手旁觀所當嚴治以肅路將之體者也又訪得管中權後部把總王嗣濬素

性殘忍惟恣淫刑到任以來專用書手陳秀爲機械專差管班梁相黎亮爲過付密結跟役溫玄旗手江明爲腹心剝兵濟私每新補把總一名公堂銀十兩哨官一名銀五兩捕隊一名銀一兩新兵一名銀五錢扣收入囊肆無忌憚又崇禎十年五月到任查點前後二部船兵革退一十九名每名索取月糧銀八錢管班旗手每名另取小包二錢方准收復又本年三月召募新兵三十五名每名扣尅兵糧銀一兩二錢每月每名又索使費銀五分有交有證本年三月內領餉修整大小船隻每大修小修減尅料銀九十餘兩各兵共證又本官凡遇各兵告假每名指銀一錢方准三日如過期一日又索取銀一錢如不遵依細責三十棍各兵畏怨俱經訐告有案此一弁者剝削偏工統馭無術下激卒伍鼓譟上經鎮將申叅所當並治以儆偏禪之玩者也仰臣因是而有請焉香

山叅將之設專爲彈壓澳彝耳擁兵建牙權非輕小乃澳彝泡寄
海濱仰命中國原無他志可恨者姦人貪餌勾通自壞漢法而叅
將指染其中遂鼻穿其線網維一解流弊何窮如楊元其已事也
現今提彝正法收拾需人查廣東都司王化行清真任事才勇兼
優且資俸及瓜以之陞補則朝聞命而夕受事自能潔已釐姦操
戎索于剛柔之宜而海防可賴矣理合具題伏乞勅下兵部再加
查覈如果臣言不謬將鄭芝龍等分別紀錄備擢楊元等照例處
分王化行就近陞補庶地方得人而將領亦知勸懲矣謹題請旨
崇禎十一年九月初一日題十二年正月初五日奉 旨該部知
道

直糾貪婪監司疏

題爲直糾貪婪監司以肅彝防事臣惟監司居風憲之地海道筦

彝夏之防少知自好當爲朝廷存體統不謂結狐鼠以行奸欺蠻
髦而攫利如陶崇道可異也本官與臣同城朝夕共事才識機警
臣甚任之三月委署海道四月澳彝殺官臣時剿寇韶州貽書本
官處置臣度其才雅足辦此卽本官一宣諭間該彝投詞伏罪此
豈敢抗漢官法哉奈本官智以譎行才爲貪使居澳彝爲奇貨引
奸攬爲幕賓待衙蠹如腹心憑中軍作線索恣行其牢籠吞噬之
計始猶坐道衙修啟閉旣且移浮宅向海濱朝進一攬焉講話暮
進一彝焉稟事中軍直闖榻前家僮招搖門外而彝金之五十餘
箱乘便烹分過付矣然河干非無人之鄉通國有如沸之口臣待
人坦白始旣相託終欲相成書示本官謂奸攬具萬和有負該道
而本官不問也吞其餌難割其人也又謂風聞澳中載金打點而
本官則曰利其貢獻生員孝廉縉紳也豈非已實欲之而借他人

爲解嘲耶又謂獻縛何日則曰罪藝澳中自盡斷難責以內地正法豈非利其所有而爲蠻奴作說客耶臣謬其詞曰刑罪人于市刑澳藝于澳但須獻罪至耳而藝不至本官計無所出面獎之重賞之縱中軍航貨以餌之而藝不至申挈別攬以示威質畱藝商以責信而藝不至藝旣割金便思貸死本官陰陽簸弄藝人實應且憎臣見潦倒狼狽恐生藝變始檄新道速任料理本官尙攜文卷歸端州以幾倖藝人之至而藝終不至又閱月始送文卷還海道詳語刺刺不自覺情見乎詞也臣與新道臣劉柱國商確藝黨不除藝心不腹藝之觀望不斷藝之縛獻不來于是吳萬和等處而藝懾騙金打點之奸破而罪藝六名番哨二十人之縛至卽今纍纍繫獄安在不向內地正法哉本官追憶前言成何面孔而腹弁吳維憲者尙敢逞其故智嚇詐藝金粧誣清官混淆黑白向使

新道慧以之誦成則舊道賄賂之誦解矣詎料新道緝贓之舉發而舊道受贓之案確哉未幾澳藝投詞自首詞聯本官據藝目呈中稱官幹稱道諭稱把柄在手稱包銀五萬稱誤墮奸計稱獻追克餉而道果何人哉堂堂方面祿位非輕伎同盜鈴裏如敗絮貽譏市井取誚犬羊命金兩失在狙藝方致恨暮四朝三廉隅全墮卽本官亦真覺心勞日掘壞戎索而啓外藝之輕辱朝廷而羞當世之士卽甚愛本官者不能爲之解矣臣謹就事論事無庸旁及直據採訪並報款符合者爲皇上陳之一本官性多豪縱衙門漫無關防久騰物議及署海道竟不駐劄衙門座船灣泊河下幾三月餘縱家人登岸需索把哨等嘖有煩言隨捕船甲郭蟾燦蘇永泰等證一本官稱巨攬吳萬和吳培宇爲澳藝信服可用偵探紅藝懾諭澳鬼臣初信之令投文見臣嚴加面飭不料本官陰與作

緣利其貢獻借以媒利以致醜聲播著通省轟傳証一本官受中軍兵維憲銀三百兩申委兼攝廣海印務書手羅益交證益受銀五十兩一堂貓鼠同眠成何憲體一本官爲黑爨殺兵一事聽攬頭吳萬和吳培宇中軍兵維憲嚇詐爨銀五十二箱打點稟送本官銀二十箱或以食盒或以酒埕令張英周龍陳瑞搬送座船本官隨放爨目先回以段疋猪酒賞之使去餘銀三十二箱吳維憲等三人瓜分並衙門內外上下人等如羅秉謙輩均用掩口船王梁成翰攬頭許耀岳等通事洪酉林德并一號船捕盜黃金正等証一本官署海道聽吳維憲播弄將攬商李明鄒陳躋寰王仰疇施敬史希聖謝尊宇王挺偉林樞廷等無故挈禁索銀八百兩維憲過交各攬商證一市舶司每年額餉二萬二千除抽丈爨船外盡取足于爨商入省貿易每歲夏初到省一次每次該船艇二隻

每一艇約可徵餉三千或二千餘兩本官任內一艇止報一千一百餘兩餘屬染指致令額餉大虧直年攬商可鞫證一本官每發公票開澳船貿易內藏私貨私商最多陋規免盤銀每次千兩俱羅益交證一本官任縱吳維憲萬和等押紬段五百餘箱下澳漏餉侵分故託不知門軍供報在案此一官者才情閃爍操守卑汚物議蜩螗雖備夫走卒通知似難忝顏監司之列者也伏祈勅部查覈如果臣言不謬將陶崇道照例議處庶官箴爨防兩有攸賴矣謹題請旨崇禎十一年十月十三日題十二月二十九日奉旨陶崇道風憲婪贓情罪深重著革了職并本內有名吳萬和等該撫按并提問嚴追確擬具奏

報明築造墩圍設兵措餉疏

題爲遵旨築造墩圍已竣設兵措餉並集謹據實題報并祈勅部

推補守備以資捍禦事案照先准兵部咨該兩廣總督熊文燦廣東巡按劉呈瑞題該本部覆內開看得粵海寇氛年來屢費芟夷善後急宜周悉如墩下一區科臣葉高標創議築堡設兵屯守督臣熊文燦按臣劉呈瑞與司道羈邑往復參詳築堡三百丈取蟻蝟以和土沙設兵六百名抽碣石而兼召募餉則墟單稻鹽四款不煩別議轉輸官則欽依守備一員仍屬惠叅節制匪惟嚴一邑之門戶實控全省之咽喉等因奉聖旨這墩下築堡設兵籌餉等事宜有裨海防俱依擬著刻期報竣早奏成功守備官該督按暫擇堪用的具題委署俟事就緒該部仍與酌推欽此欽遵備咨前來該前督臣案行該司道行該府縣遵照臣到任接管卽嚴行督催築造堡圖并行差官募兵查議餉銀去後今據該廣東按察司呈准分守嶺東道副使劉行義手本據海豐縣申詳築墩鎮城外

圖已完并繕造城樓衙舍緣繇到道移報到司詳報到臣該臣會同巡按廣東監察御史葛徵奇看得墩下一地實彘寇垂涎耽伺要險也曩歲香賊授首之後科臣葉高標慨念維桑首議建鎮而前督臣熊文燦按臣劉呈瑞與諸司籌畫長策條上事宜蒙旨下部覆請允行一時道府廳縣等官同心協力百工具舉臣等嚴以董之未幾鎮之外圍報完惟城樓衙舍等項未創臣謂有一不備不可以結局復批估發銀建造并調募兵船確定屯餉等務俱勒限完報今據報築完灰城一鎮周圍三百二十四丈內外門樓八座鏡櫃一十六臺守司分司廟宇兵房俱已落成完固水兵三百船六隻獨自碣寨陸兵三百業經募足給以半餉半屯事事俱備屹然爲粵之巨鎮足以仰紆皇上南顧之憂而成部科與前督按長治之計謨矣是役也以蟻土代磚石功堅而費省錢糧俱屬設

處不煩籲呼給兵以餉以屯可垂永久在事諸臣苦心竭力如始
事相基經理獨勤則原任惠州府推官今科臣吳希哲暨原任海
豐知縣今調任張祈年版築並興督理匪懈則原任惠州府通判
蕭可風暨管工守備魏藩宋當時誥舉羸而能加意存發用底厥
績則原任糧儲署嶺東道今陞按察使劉士禎原任嶺東道今陞
叅政劉行義以上諸臣內除蕭可風經臣別訪糾叅提問外吳希
哲劉士禎劉行義張祈年魏藩宋俱應聽部覆覈分別紀錄以示
激勸者也至于守備原奉旨先題委署俟事就緒該部酌推緣時
兵餉未集未便題署今城工已竣兵餉俱備所有原議設欽依守
備一員相應聽部酌推理合具題伏乞勅下該部覆議將劉士禎
等紀錄亟推謀勇慣水守備官一員嚴限前來任事庶人心競勸
而海邦賴收寧之慶矣謹題請旨崇禎十一年十一月初一日題

十二年三月初四日奉 旨該部知道

雲隱堂文集卷之六

相州 張鏡心晦臣甫著 子潛編校

奏議六

聞警整兵勤王疏

兩廣總督臣張 謹題為驚聞 警孔棘恭報整兵境上候命進
發少效遠臣分誼事臣起家經術荷國厚恩歷侍從卿寺濫塵粵
鉞跡淹萬里心切五雲忽十一月初十日從邸報中見戶兵二部
奉皇上傳諭 于九月二十二日 口飭備戰守等事臣不覺
義憤填膺耻張髮豎惟我皇上英明神武何等震疊廷臣謀猷策
力何等綢繆 通 各處重臣錯制何等嚴密尙至 大舉

西 亦安所庸纍纍若若為矣恨粵南界地盡之邦比聞報
已月餘之外料此日禁旅攸加定收 只遐避之區未得驟聞

薪膽之氣不勝鬱勃雖廟堂之上謀斷文資暇整制敵如雲如雨不檄遠兵而粵亦王土粵亦王臣主憂臣辱安敢自後謹先選精兵一旅繕甲製器厲兵秣馬委雷廉叅將吳宜猷爲統帥加銜都司楊奇琳雷大壯守備葉正芳爲分部高州府同知宋應昇爲監紀屯駐境上恭候明旨進發若 兵引息臣當恪守信疆或制勝不拒普天微塵可飛泰岳則臣當聞命督趨枕戈從事以効忠憤之志而已謹題請旨崇禎十一年十一月二十二日題十二年三月初二日奉 旨知道了張鏡心著整理地方不必督兵入援該部知道

聞警措處助餉疏

題爲烽火戒嚴軍需孔急謹竭遠臣涓埃仰佐中朝制勝事臣以警日逼忠懷鬱勃業選將厲兵陳境上以候進止正繕疏奏聞

間接邸報見吏部覆三審機宜疏稱御前發下紅本該閣部楊嗣昌題前事內有調兵一事往歲有警通行浙直閩廣雲貴川湖等處似屬遠水無濟近火臣愚未敢倣行等語想見廷謨蚤定目下義旅雲屯捷音定布斯誠皇靈丕振之一機也臣拊躬同督撫之班舉目有山河之隔部咨無據豈敢自阻于遐陬明旨未臨畢竟躊躇于當境反覆思維無可自効頃見計臣仰屋請及內帑軍國之需上厯宵旰臣犬馬之足旣不克蚤備馳驅涓滴之流或猶可仰塵滄海查臣屬梧餉一項例供軍需湊解督餉從前委官查貯頗有贏餘近以師旅繁興理臣熊文燦因勦寇之行旣陳師備糈入掃中原臣愚因搗巢之役又措餉徵兵用清南服供億殫虛中枯外竭臣謹多方措處徹底清釐括得梧庫稅餉銀一萬兩廣東曠餉銀八千九百兩建連平城工支剩銀七千兩解充募造撥貯

菜餉等銀四千一百兩共得三萬兩差番禺縣主簿郝鳴臯于本年十一月二十八日給批起程遄解軍前少資騰飽之需聊效高深之助此則臣區區天末之微忱也伏祈敕下該部查收施行謹題請旨崇禎十一年十一月二十九日題十二年三月初四日奉旨這銀兩著炤數查收該部知道

再解緝獲澳金助餉疏

題爲再報附解緝獲鑿金仰佐軍需事臣見 勢披 國用殷繁合按二粵得銀三萬兩具疏題解而臣愚區區未敢自己誠念國家三空四盡凡爲臣子苟有絲毫積貯忍不悉索以供軍興臣謹會同廣東巡按御史葛徵奇查得海道劉柱國拏獲吳維憲詐騙鑿金一萬四千六百餘兩益本官清真任事奪諸貪弁之吻而得之者也念鑿入市餉久虧緣官貪弁濁總成尾閭歸虛幸道臣正

已率下遂源潔流清立獲金錢鉅萬誠轉無用爲有用可佐軍前醜續之資者也謹令炤原估七九成色傾銷成錠共實銀一萬一千五百六十七兩四錢一分七釐附差主簿郝鳴臯解進總期有一分效一分之用蚤一日獲一日之需在朝廷徵兵措餉大渙主居在遐方挹彼注茲何羞行潦伏祈敕部查收庶于軍前急需少裨益矣謹題 旨崇禎十一年十一月二十九日題十二年三月初五日奉 旨該部知道

調補繁劇縣官疏

題爲議請調補繁劇縣官以資保障事據廣東左布政使司姜一洪呈奉臣會牌會同署按察司事副使劉柱國看得高要與新會其縣令皆有難副之責非如他邑比現今懸缺若候部推然後捧檄受事未免逾時恐生叵測查得始興縣知縣蕭琦吳川縣知縣

王泰徵才品俱卓治行並優似宜調高要新會二縣等因到臣該臣議高要新會皆巖邑也高要則居臣鎮下地當兩粵之衝百務煩劇一切詰戎靖盜議餉擷器皆倚藉焉故其急在精明強幹之令新會則負海枕山夙稱盜藪兼之俗悍民刁縣官之經告訐去者趾相接也一切銷弭釁患鎮靜喧囂尤爲喫緊故其急在沉毅謀略之令乃高要自知縣張源思丁艱迄今缺官半載代庖無人屢署屢更新會知縣譚景行爲士民訐告被劾離任又值汎寇竊發之日內外紛譁均難一日缺乎其人者誠恐坐俟部推非數月不至而要地之委頓卽臣亦靡所藉手以展布也茲據該司查有始興縣知縣蕭琦吳川縣知縣王泰徵端凝定力擘畫長才雞邑未盡其宏施鴻抱正需于劇地雅足稱其任而愉快若以蕭琦調高要以王泰徵調新會俾朝聞命而夕受事則天末遐陬得早

借賢才之用以綢繆劇地庶鎮務與海防兩有攸賴矣既經該司會議前來謹會同巡按廣東監察御史李雲鴻具題伏祈敕下吏部覆議將二官調補高要新會二縣遺下員缺另行銓補庶巖邑得人遐方嘉賴匪眇小也謹題請旨崇禎十二年正月二十八日題四月十二日奉 旨吏部知道

請移賢能監司疏

題爲酌請更移賢能監司以資保障事竊炤兩粵地方枕山負海雖均屬遐陬而地亦有邊腹之異所設監司提衡水陸雖均屬重寄而人亦有邊腹之宜故必任用各當其才而後事功可奏其效如粵東海北道統轄雷廉西控交趾南濱巨洋內則珠盜披猖外則島獒窺伺實邊藩之要地也粵西蒼梧道專轄梧郡商民輳集狼狽錯居雖邇來頗稱恬熙而壤當兩廣之交夙稱重鎮亦內地

之要會也二道干係俱重然以時勢論之在海北則急在禦外而次及內寧在蒼梧則急在撫民而次及馭獠况近報海寇十餘艘聯踪揚帆游移海北一帶情形叵測則隨才量移以資彈壓誠有不容已者查得蒼梧守道叅議唐顯悅才優揮霍胸貯甲兵長於邊藩海北兵巡道叅議張國經資器恬靜經濟宜民長於內治而論各資俸則國經已滿三年顯悅亦近二載且有監勦楚寇軍功若當二臣需次陞轉之期為兩地急在得人之計彼此更移俾各當其任封疆利賴匪小此實臣為地方起見非有所輕重於其間也雖地分兩省而皆在臣督屬業移會廣西撫按二臣咸以為宜益見保障之有同心也臣謹會同巡撫廣西地方都察院右副都御史林贊巡按廣西監察御史陳曷虞具題伏祈敕下吏部亟議兩官相應職銜將唐顯悅改廣東海北巡道張國經改廣西蒼梧

守道庶邊腹得人而嶺海賴牧寧之慶矣謹題請旨崇禎十二年二月十五日題四月十二日奉 旨吏部知道

陳交兵聚散情形疏

題為爨屬相殘漢禁罔軼謹就交兵前後聚散情形并申國諭飭始末據實上聞以祈聖鑒事竊炤安南屬爨黎主之莫亦並存中國原有深意而在彼則不共戴之仇也往年莫頗跳梁而黎亦逋貢隨方駕馭宣戢則又中國以不治治之也崇禎十一年二月十三日據分守左江帶管兵巡道叅議張一鳳呈准遊擊管南太叅將事章易手本移報黎莫稱兵尋禍等情到臣該臣會同巡撫廣西地方都察院右副都御史林贊巡按廣西監察御史左永圖看得從古馭爨之法詳內略外詳內者在我無事修備有事議防慎守邊圉不令闖入略外者爨人獷悍互相仇噬犬羊之性未可全

以漢法繩之也寧第罔繩正雷互角之雄為兩弱之地我國家制馭安南始之立莫并與存黎後之立黎仍復存莫外以號于彞曰貢臣之裔不忍滅沒而實有深意存乎其中計莫有善焉者矣所以歷年以來自相侵伐弱者傷強者疲匪朝伊夕去歲春月黎乘莫之禍張威肆毒莫因黎之驕扼嶮挫衆維時臣等嚴檄道將文告以諭之嚴兵以備之三令五申繕器控塞存漢官之縲約然已策鄭柵之難得志也但兩彞攻伐未休西圉保守罔軼正竅查有確一情形會疏入告而秋冬間鄭柵復作捲土重來之計矣攜維祺以張聲勢用降孽以作反攻汝康巖一圍自謂沼莫為魚詎知莫彞多智斂弱用譎據嶮死戰卒敗強隣以自存立且始終用兵一載邊境宴然即以莫之窮逋未有竄入遐疆之上二三將吏拮据綢繆可幸不至隕越皆仰賴我皇上威靈遐暢封域載寧漢土

之雞犬不驚封殖之部彞並峙然後總彙前後情形據實上聞以紓南顧伏祈敕下該部覆核施行謹題請旨崇禎十二年三月二十二日題五月二十二日奉 旨兵部知道

請速推補緊要監司疏

題為粵東監司一時多缺地方緊要彈壓需人謹據實題請敕部速賜就近推補以重巖疆事竊粵東地方枕山帶海外而交彞倭寇鴟張于邊陲內而澳番猺黎鷲伏于肘腋兼之土賊伺釁狂逞海寇乘風流突益無地而不嶮要衝繁無時而不需官彈壓兼之邇來糧餉督催孔亟欵件銷繳難稽又且計典屆期百冗俱集故必藩臬各道布列有位斯克共濟時艱乃今清軍右布政使與羅定兵備道嶺西兵巡道俱懸缺未補近按察使劉士禎又報陞福建右布政使嶺南兵巡道叅政吳麟瑞亦報補江西湖西道俱

見在離任而嶺南分守道叅政陳之美又以患病沉重屢懇歸休
見在疏題請補卽海北分守道叅議莊元禎以齋捧未回查其資
俸已深恐且晚亦別遷轉所見在司道落落晨星並帶攝署篆亦
乏其人地方隱憂可虞諸務叢脞滋甚伏乞皇上軫念粵東多事
之地監司不宜久曠敕下該部將前項員缺亟賜就近推補才望
之官勒限前來到任俾邊海吏治民生均有攸賴矣抑臣更有請
者按察使劉士禎清貞威惠久任粵中士民歸心嶺南巡道吳麟
瑞嚴簡方正到任未朞忽聞別調一時人情繫屬無不合詞攀轅
雖兩臣怵功令之嚴苦不肯畱而聖明責久任之效惠茲遐疆似
應敕部議畱以濟東粵一時乏人之急者也若士禎職司憲臬當
茲六察在卽甄別需人舊例粵大計報冊不出九月今士禎一去
恐新補者未獲卽至卽至亦在八九月其有濟乎況聞右轄事務

清簡而粵各司一時並缺挹彼注茲實實從公家起見想吏部有
同心也伏祈敕部酌議緩急或就以劉士禎加右布政新銜乃官
按察使事而麟瑞竢任滿陞擢庶得本官在任共襄計典而一時
缺人之東粵所補救非眇小矣臣謹會同巡撫南贛汀韶等處地
方都察院右僉都御史王之良巡按廣東監察御史李雲鴻具題
伏祈敕下該部覆議施行謹題請旨崇禎十二年四月十八日題
奉 旨

請就近陞補要地道臣疏

謹題爲道臣患病情真要地缺官可慮伏祈聖恩俯容回籍調理
兼就近陞補以重地方事崇禎十一年十二月初十日該本司左
布政姜一洪奉臣批看得廣東分守嶺南道右叅政陳之美病勢
危急刀圭罔效屢經陳請委難勉強供職又奉憲批看得嶺南多

事見在乏員銓補未能卽至查得肇慶府知府蔡秋卿植品清貞賦才宏練資俸俱深若以本官陞補斯職實爲相宜等因具詳到臣該臣會同巡撫南贛汀韶等處地方都察院右僉都御史王之良巡按廣東監察御史李雲鴻看得各道分隸郡治職司錢糧兵馬然未有如嶺南守道之轄之遠者也嶺南守道屬廣韶雄三府延袤幾一千五百餘里而又密邇楚虔包絡山澤寇盜竊發不時見告所以道司有移駐清遠之議誠謂清遠爲三府適中之地共資彈壓耳此其關係何如而況當東粵方面晨星寥落之時誰忍輕言去亦誰敢輕任其去者無奈該道陳之美病苦支離形神委頓已非一日同官目擊代爲陳祈真不能一刻畱者臣等再四批查取結方代請放歸非敢以功令爲嘗試也第此缺控地旣遠借資甚急當同官呼籲移守之日足見其多事倚毗之殷倘乏人廢

事或久缺滋誤臣等又豈敢以地方爲微倖哉茲據該司查議得肇慶府知府蔡秋卿品格清真才猷練達且淵凝沉毅不大聲色而經濟源源出之不匱其表見于臣鎮下者亦旣知之真而悉之熟矣况資俸及期以之陞補前缺朝聞命而夕受事其重清遠扼要之守而備三府多事之急者裨益非淺鮮矣伏祈敕部查議陳之美回籍調理蔡秋卿就近陞任並該道移駐清遠事宜一并具覆施行謹題請旨崇禎十二年四月二十一日題七月初四日奉旨該部知道

搜釐捐助以供軍需疏

題爲遵旨捐助以供急需事崇禎十一年十二月初七日准戶部咨該本部題前事內開烽火突 征調繁興一應行鹽輓運犒勞等項日費不貲請敕各直省撫按倡率司道府各隨其便多者搜

捐四五百金少亦三百金州縣上則應捐三百金中則應捐二百金下則應捐一百金文到卽捐解司府開列職名數目彙解以濟新餉之急等因崇禎十一年十月二十日奉聖旨依議行有借端暗派小民及潛那正項的該撫按卽行指叅重究如撫按官隱徇一體論治欽此欽遵抄出到部備咨前來依經案行廣東布政司轉行各司道府州縣欽遵捐解去後崇禎十二年三月十一日又准本部咨爲恭承清問竊効愚衷再補未盡之辭少助軍國之計事該本部題覆河南道掌道事監察御史張應星題前事等因崇禎十一年十一月十一日具題十二日奉聖旨這籌餉各款旣經酌妥俱如議速行事平分別敘錄內註誤者不必預定開復欽此欽遵備咨前來計開一在外巡撫衙門屢年有俸薪公費大省可助五千金次者亦可助三千金倍道馳解濟用事平優敘等因并

列郡邑富民與司府州縣各應輸助銀數條款到臣又經案行該布政司轉行欽遵捐解去後該臣看得

跳動師旅繁興當三

空四盡之日供億不貲凡普天率土之臣涓埃畢獻項乃明綸再下部檄頻飛仰見中朝蒿目之殷敢不多方捐竭以急腹心之急除臣聞警後撥軍需並獲贓銀四萬有奇解助外若臣祿米俸薪扣解一年零五月爲數固無幾也不得已按臣衙門之廩餼官舍之口糧凡屬年來銖積寸累皆令報出至交際之需犒賚之用臣經經之性素加裁節一并以畱餘湊數緣臣叨寄軍旅忝思職要詞訟之事各有司存臣到任後以省刑息訟示下每月減告期爲一次每次准重大利害事五六紙則贖緩一項除炤例解京外固地方有司士民所共見也只有曠餉一事爲修船繕器火藥勦糧之費者凡有存餘悉索以貢合之得三千金解進庶少竭犬馬之

誠仰備醪續之需乎再查先據去任鹽法道叅政王繼廉報積存
係倉鹽折價銀二千五百兩近又據鹽法道副使曾棟報接積貯
贓贖鹽價等銀一千五百三十五兩六錢六分一釐九毫堪以充
餉報助是皆轉無用爲有用合之可以供軍前飽騰之需者也業
俱行司搭併解餉差官鄧從讚起解外其司道府州縣各官之輸
助節經嚴檄督催盡力捐報並嚴那派之令竢該司類齊上報總
之以朝廷之物力仰供朝廷總計七千有奇雖遠臣之芹曝實太
倉之梯米凡爲臣子後食之誼急公之志固不後于臣也理合題
報伏祈敕下該部查收施行謹題請旨崇禎十二年五月初七日
題七月二十二日奉 旨這銀兩著炤數查收該部知道

舉劾防汛將領疏

題爲遵例舉劾防汛將領以昭勸懲事卷查先准兵部咨該本部

題奉欽依以後督撫等官每遇沿海兩汛完日逐一體訪查炤九
邊事例于歲終將大小將領分別臧否如其果賢從公議畱如其
不肖據法議斥如其人地不相宜不妨議調等因備咨前來通行
遵炤在卷今炤崇禎十一年兩汛已畢所有在汛諸臣例應舉劾
隨牌行廣東布按貳司守巡各道及總兵官查將海防大小將領
賢否開造文冊繳報到臣謹會同巡按廣東監察御史李雲鴻據
實爲皇上陳之看得廣東總兵官許自強謨涵淵岳氣吐風雲以
大樹丰裁爲重溟保障駕馭兵將克修黃石五事而水陸操練先
後分合曲盡其制不愧戚氏新書誠卓然師貞之吉也潮漳副總
兵鄭芝龍丰神英秀機智深沉節制之嚴使三軍不敢仰視威行
海上譽著東西桓桓報國之身自負固宏遠矣廣州海防副總黎
延慶籌海胸有金城殲寇戎無伏莽制彘之法扼要之圖真如聚

米累石而夷險風雲不出掌握兩年夔警不作海水晏然功冠諸路將上惠州叅將施王政神情爽朗器度端凝談兵則口若懸河擁盾則令如山岳自持嚴明馭士恩法二源廓清首建巨烈以方會勦之師孰得而京焉西山副總徐之龍韜略家傳火攻夙擅九載粵中操持匪懈征九連征劉香合二源之勦功而三矣不于登壇曷酬壯績陽電叅將楊文炳器宇淵澄才情煥發擒積年巨盜三邑又安驅竊發海氛兩郡寧謐有古名將遺風雷廉叅將吳宣猷籌戎料敵極有心思以精明暇整出之故汛守愆而海不揚波偵諜嚴而林無伏莽捐造戰艇銳意請纓弁流中之表表也裏海叅將鄧光忬善讀父書深知將略任事方新巡徼不遺餘力嚴玩把獲巨奸奉行三尺凜凜海氛漸清省會安枕本弁督緝之功豈可誣哉瓊崖叅將楊允文文能倚馬氣可鞭霆守瓊既久威著黎

岐真五指干城也澗洲遊擊趙千駟志破浪于乘風憂徹桑于末雨造戰艦則抽扣裁矣議海防則器甲繕矣練達沉雄之氣即幽燕宿將何以加茲廣東練兵遊擊陳經武火器擅百發百中之奇橫海有乘風破浪之勇且實心朴行馭卒有恩質訥若不出口而擊楫則慷慨自命有用之才也廣東都司新補香山叅將王化行司閩則金湯鞏固署叅則海澳澄清清查缺軍缺官俸糧及貼黃免操馬價解京助餉又捐造火藥千桶備用益操守謹嚴而守禦畱心者軍戴恩威夔歸駕馭當不負戎索之寄委署惠州叅務副總朱之胤風度不凡冰衷無染驍騰有伏櫪之悲署惠普挾纊之德而靖山氛防碣石既著效于澗池宜酬庸于粵海都司僉書孫昌祚胸藏豹略才捷鷹揚齎表任三載之勞理局絕一絲之染不媿輕裘高風原柘林守備新陞潮州叅將林宏英姿如虎如熊偉

略潛天潛地氣奮衝鋒功成惡戰卓然海國飛將軍也東山守備
陳良弼有智將之膽識有賢將之風規讖盜罕一字出入馭下無
一卒縱橫五款不託空言群寇旋就戡戡兜鍪中鮮見者樂安守
備陳瑚才經百練氣雄萬夫恩威所至能使土黎帖然功在瓊海
矣都司胡美赳赳之雄侃侃之氣因吳宜猷選練入援之兵俾署
該叅兵務卽其勇往叱馭固已目無游氛未易才也欽州守備屠
世儀才以練而彌堅技因習而倍勇欽州要地年來無鯨鯢之跳
動可以徵效矣旗鼓嚴遵誥精神沉毅氣槩軒翔有排紛濟變之
才足投大遺艱之任其受事在汛前而壯略已可表見者南韶守
備周一誠體貌軒昂精神煥發江盜潛踪部民戴福一路之桴鼓
不鳴借彈壓多矣總兵旗鼓郭啓襄智捷脫機才堪迅掃蓬幕勤
勞匪懈水犀訓練有方廣海守備曹師和朝氣方新練才足倚受

事防汛之衝而設備禦侮居然壁壘聿壯未可以任淺遺也候任
旗鼓區成勩精明歷練之才醇謹剛方之氣管總巡兵務守備何
兆寧慷慨臨戎雍容料敵可當一面干城碣石把總黃夢選計必
需之餉閩卒無譁練新集之兵汛防克鞏允堪千夫袖領白沙寨
把總許大才駕海英猷視輪妙技不負千陬之選海北巡道中軍
守備葉正芳討軍實以振武功昆明之劍氣猶寒瀚海之波光載
謐嶺西巡道中軍守備朱德先恩濡醪續勢挾風雷弘豎可望廣
海右部守備馮燿輕裘蹈海長劍倚山望而知為能將南澳把總
守備歐奇魁梧奮激有奪幟衝鋒之能克壯前驅防海冠軍也北
岸營把總楊士龍挽強能勝千鈞禦敵堪提一旅不愧才弁羅定
標營把總鄭宇斌雄心火烈猛氣風颺遠大可造之器肇慶衛指
揮蘇萬邦志存向上事切急公守禦不避艱難布置皆有頭緒肇

慶指揮郭應崑才思勤敏作用安詳勞不懈乎周巡效已徵于謹
守肇慶指揮王綬才既明給意亦安閑強項出以細心敢爲濟之
冲度清遠衛指揮嚴耀宗猷爲練達氣度老成遠偵有息卽通嚴
守無事不密清遠指揮陳課滅賊之志甚長任事之能尤勇足備
緩急堪效馳驅以上諸臣或總戎索于海上或宣策力于行間或
積之歲月或試之艱難均有功于汛防所當薦揚以備擢用者也
內如朱之胤胡美雖未有實缺原屬粵弁在候補之例有效用之
勞例應一體薦敘再查有管造銃器守備陳王英才優幹濟念絕
營求火攻擅八面之鋒督銃鼓百工之勸管把總事守備魯華氣
足催堅膽可制敵有千人必往之勇非一劍自雄之夫肇標把總
徐時化防韶有益地方練卒能持紀律肇營把總黎樹績戰伐名
著連陽防守功高江道管虎門前司事僉書張祖武以緝詐擒賊

之績佐內安外勦之奇肇營把總加守備成之度沉潛有用之器
規恢遠到之才肇營把總李廷龍撫馭常沛恩膏干陬不辭竭蹶
裏海把總李人龍捍海氛無晝無夜窮賊窟必躬必親裏海下中
把總李承錫收底定于江門保狂瀾之謐如撫蠶把總李燦秀令
行諸蠶効著海濱陽電把總張上位力縛巨盜功著一隅以上皆
積勞可紀長技可收不忍湮沒茲敘及之以鼓將來者也若夫不
職之弁臣嚴核之得五人焉其一爲坐營都司馮其原一本官性
情躁厲法令苛刻舊日操練常規以九矢爲率凡中二矢爲合式
免責本官自立新制只用五矢中第一矢至第三矢每矢准作二
矢至第四五矢方中者俱不作合式每操責罰百餘人以致兵心
痛恨一本年三月內因陳遊擊奉差出海備汛委本官暫理西教
場營務各把哨畏懼本官素刻把總五員哨官十名各送拜見常

例本官不能謝絕成何官體徐時化證一本官攝遊擊事議革把
哨書記及跟役另招頂補三四十人一憑跟隨掌班需索本官全
無鈐束兵謗大起傅尙龍吳英等證此一弁者有揮霍之才無沉
靜之器宜量罰改調以示創者其一爲奉委選練入衛加銜都司
僉書楊奇琳一本官委征楚寇有功及奉旨選練候調入衛念前
勞俾領偏師隨吳叅將備援本官素志頓墮束軍無法例索把總
二名哨官九名各拜見例銀十兩五兩不等憑掌班葉大有過付
呂挺然等證一營兵潘廣包奸陳宇壯妻被宇壯打死各兵乘機
搶宇壯之家本官歸咎把總李嵩束兵不嚴勒銀八十兩免申葉
大有過付烹分李嵩證一本官春操每營歛猪羊銀八兩五營隊
兵證一本官私更隊長革換散兵至三四十名各需索三兩一兩
不等迨解嚴免調各兵安家不領以致無償飲痛入骨一本官立

威嚇衆遇操期借公行私降革不平但憑葉大有唆囑各隊兵證
其一爲惠州衛都司僉書指揮使雷大壯一本官歷年征寇敘功
奉旨候缺推用委管後營選練初見謹飭後漸疏縱任把總羅逢
恩扣兵常例三兩二兩不等大家染指蔣清等證一本官聽信書
記吳敏中凡哨官革換每名三兩俱敏中包收本官漫無覺察隊
兵等證一本官聽用管班梁鳴玉王應科爲耳目凡各兵事故逃
亡沉匿不報假倚操革二月換至八十餘名任二殺索詐常例不
加鈐束藍振證一本官比技卽雨熱不歇凡新兵一次技藝生疏
卽行逐革又濫收無賴棍流兵心不服此二弁者守不副才器不
稱力或蠅營狗苟是圖或委轡縱奸不顧致營兵譁然于西教場
豎旗激變臣差遊擊陳經武旗鼓官嚴遵誥往諭各兵望見二官
卽稱此好官也有公道有恩澤願聽統束陳經武亦標下練兵官

嚴遵誥亦入衛選練官而恩怨若此則愚頑之卒豈盡無是非哉
隨取各兵訴狀具陳前官選練不法臣卽批署嶺西兵巡道吳麟
瑞寃報去後各兵安帖歸伍但鼓衆豎旗漸豈可長仍檄陳經武
查緝爲首究治外然各弁之罪懲不可貸也其一爲廉州衛中所
達副千戶佟國欽一本官奉委往廣省打造捕盜陳惟義陳國良
羅華兵船三隻內陳惟義卽經革陳起改名起行之時衆兵不服
稟府另換佟國欽再三稟留後惟義自思衆旣不服至省恐有敗
露遂私頂與異棍葉昌代往本官縱容不報遂致通同乾沒船價
一本官在省領餉打造完三船具報廣州府海防官轉報海道關
驗時國欽自知侵尅料價葉昌一船板薄釘稀誠恐驗出主令葉
昌先將本船私駕潛逃出海賣匿後經海道驗發陳國良羅華二
船國欽駕至中途又將陳國良一船販賣計盜賣葉昌國良二船

共騙餉銀五百六十兩零入已止駕羅華一船回寨瞞報道府捏
稱二船俱至洞洲遇賊奪去致該道府只議追賠一船之價後因
該衛千戶于朝相續委造船先以抽頭船價之說妄稟濶洲遊擊
本遊直斥其非詳批解審訊出佟國欽前項盜賣侵騙船價情弊
在案此一弁者質本猥庸心實貪狡委造盜賣二船婪沒官銀五
百餘兩若不以三尺繩之名法掃地矣相應革任追擬重究者也
其一爲總兵坐營都司官樂嗣功據海道帶管分守嶺南道劉柱
國詳開東兵無方據各營把總周國祥等具呈三月二十日操畢
各目兵屯聚不散稱兵等領給火藥鉛彈入援擡至小市街平遭
勢宦林僕開桶盤詰不從細縛酷打稟坐營司救詎城狐社鼠變
法酷兵勒銀釋放等情又稱奉令勤王樂嗣功造計酷兵每兵科
銀三錢通營目擊等因嗟夫近日之兵以訐官爲常事以鼓衆爲

公呈臣亦念其刁不可啓隨批該道將宦僕刁兵並行審究外竊念堂堂坐營官有何畏忌不可爲兵一明寃致其囂然也況常例之索卽分毫有染亦何以杜卒伍之口則此一弁者庸冗無能首鼠自託應行降調以懲其怠玩者也再炤臣鎮下坐營中軍都司官爲轅門之綱紀作鎮兵之領袖凡戍梧官軍達舍江道營兵胥隸焉誠不可一日虛無人也馮其原經臣叅處現今鋒營標兵散無統束查有旗鼓守備嚴遵誥器略淵涵精神挺拔御卒伍有恩而號令整齊有一軍不可犯之色查本官前任淮揚已及二載合今俸應在陞轉之例仰祈聖裁下部酌議陞補則聞命任事不出三月間臣衙門收得人之益非淺矣敢因防汛之例舉其堪任劾其不職者而並及之伏祈敕部查議如果臣言不謬將許自強等擢用紀錄將馮其原等分別輕重炤例懲究追擬又將嚴遵誥就

近推補則勸懲嚴明而海防其有裨矣謹題請旨崇禎十二年五月初五日題七月二十一日奉 旨兵部知道

請給移贈誥命疏

奏爲遵奉詔書請給誥命移贈以彰盛典事臣于崇禎十二年五月二十九日准巡按廣東監察御史李雲鴻會案稿爲青宮之毓德方新文母之發祥彌厚等事奉都察院勘劄准刑部咨河南司案呈本年三月二十二日奉本部送禮部膳黃恩詔條款到部送司奉此除移付各司遵行外相應咨行該撫按遵行等因案呈到部移咨到院備劄前來奉此擬合行移到臣臣伏讀詔書內一款兩京文武官一品至九品各給與應得誥敕先給領者進本品勲階一等品同而職銜不同者炤見任改給凡願移封移贈者聽欽此炤臣中天啓壬戌進士起家縣令歷官省寺復蒙皇上俯採會

皇清聖祖文集卷之六
推于崇禎十年閏四月陞臣兵部右侍郎兼都察院右僉都御史
總督兩廣軍務糧餉兼巡撫廣東地方顧此隆恩豈臣區區愚陋
所能仰邀實賴臣祖父母庭訓淵源臣父母義方嚴切俾臣遵循
毘勉以有今日猶憶臣丁丑年忽奉兩粵之命臣父原任樂至縣
知縣仁聲臣母原封太孺人許氏俱以八旬之年幡然一堂臣烏
私縈繫不忍遠離具疏籲辭未蒙俞允臣父母以大義勉臣謂自
臣曾祖以來世受國恩當宜力盡瘁以報天子又拈謹慎忠勤四
字令臣佩服臣用是洒泣拜辭抑情就道迄今兩年來自維蒿棘
濫承三秩之榮仰顧椿萱尚安七品之命再前而祖父母生祖父
母亦僅沾臣父之贈未與臣今官之贈況臣不才任劇且夕隕越
報政榮恩豈敢過覲臣用是跼天踏地夢寐徬徨恭遇聖母皇太
后尊崇謚號聖恩下賁率土同沾給應得之恩廣移贈之例此真

千載一時而微臣之隆遇也查臣父母于崇禎二年十月內以臣
給事禮垣奉有七品敕命臣祖父一濂祖母宋氏生祖父三省生
祖母許氏並于崇禎元年三月內以臣父任樂至縣知縣奉有應
給移贈七品敕命今臣謬叨今職仰遵恩詔內應得並移贈之款
似宜均沾聖澤伏祈敕下吏部覆議臣祖父母及父母應得誥命
外准移臣及臣妻之封贈臣生祖父母庶皇上高厚之典錫類無
窮而臣父母生育之恩兼酌罔極臣感存歿光榮且益圖報于世
世矣爲此具題請旨崇禎十二年六月初二日題八月十三日奉
旨該部知道

糾縣官被許穢跡以肅法紀疏

題爲縣官穢跡因兵許彌彰謹據實糾叅以肅法紀事竊得西寧
爲羅旁新縣孤處萬山特設副總兵衙門以資捍衛蓋兵民相依

爲命也乃該縣知縣謝天申縱吏剝軍誨貪激變殊可異焉本年三月十五日據山西副總兵徐之龍報稱本山旗隊兵連各呈稱餉隨兵給兵與餉連本山額例兵糧兩月一發詎西寧縣庫吏梁禎陳大典兵房吏潘應奇每千兩巧勒使用銀二十餘兩每營索幫罪銀十七兩餘方准給散等因到部院又據西山五營隊兵陳元等團詞爲經年絕糧荼毒難堪事赴部院告稱西寧縣疆吏陳大典等恣情噬兵勒索常例幫罪銀足數始准給散有呈可據縣官蠱事凌滅衆激齊赴控告並黏單款一發糧俱不依布政司庫馬兌出每百兩扣除二兩餘不等一兵庫兩房遇發月糧勒指每千兩索取幫貼使用及盤盞等項銀二十兩一縱捕衙官濫受民詞不分兵役或討保罰罪追紙種種魚肉一各兵每年每營扣鹽價二十餘兩以充私庫一左營官兵洪欽被豪惡練總梁國朝殺

死縣官受賄三百金腹吏梁禎余之望二人過送求府解釋俱有移會手本案底可證一前營隊兵張標陳鳳郭進郭科譚洪劉通等白被賣鹽秀才通同恃勢藉盤私鹽銷局送捕廳解縣朦審每名罰徒十兩八錢含冤無訴一挖鏢沉沙木板十餘副累兵扛擡月餘見存本縣生祠收貯到臣臣卽面諭爾等兵目果被官吏勒索當聽將官申報鼓衆離伍動稱激變赴告殊駭觀聽當令回營靜聽外卽批署羅定道石副使將刁兵蠹吏審明究報聞而該縣之申詳至矣滿紙支吾不云扣餉激變而云盤詰私鹽致兵聚教場欲赴軍門告退不洽蠹吏梁禎等罪狀而云文武不和非地方之福不云放糧延遲而云因練總梁國朝擅殺官兵陶道官一駁遂爲招怨之媒等因到臣臣一并批道嚴查究治間奈該道遠在高州往返月餘不見申結臣隨將姦吏梁禎陳大典潘應奇等拏

雲隱堂文集 卷之六
來面訊招有投副將扣糧幫罪之呈卽細打示衆外隨訪得本官信任梁禎等招搖過付聽其需索常例貓鼠同眠恬不知怪卽其具呈副將公索扣貼是尙有天日乎而可委爲徐之龍之唆訐也卽如梁國韜殺兵一案明明真確本官聽腹吏梁禎過付韜銀三百兩與該道講通駁詳又何怪爲招尤之路乎其餘告款聽該道審報外卽此二事本官固宜禡追之難逃矣總之粵兵甚貧粵餉甚薄多者月糧僅八錢耳加以貪吏之散糧常例蠹弁之拜見生節種種不法層層披剝何惑乎團詞之控累百累千也其刁訐之風鼓衆揚旗似乎以軍制官以兵挾將法難姑息而官弁不肯授以口實罪尤不貸所以臣前疏中一叅五弁誠欲使將卹兵而後責兵用命也至副總兵徐之龍已經呈報而又聽兵數百人赴臣團告團告者不出首名而挾衆告官之刁例耳本將于此亦難免

于多事矣但本官壯才偉貌在西山十年不調累以求改爲請目今文武不諧勢難去文畱武使將來任事地方者不便展布似應就附近廣西邊缺中量爲移調庶本弁猶可自見而將來文武與其鑒此策同心之效耳謹會同巡按廣東監察御史李雲鴻具題伏祈敕下該部覆議如果臣言不謬將謝天申重加處分將徐之龍另行改調庶官方嚴而法紀爲之並肅矣謹題請旨崇禎十二年六月初二日題八月十三日奉 旨該部議處具奏

題明擒治諱兵以肅軍紀疏

題爲諱兵漸不可長首惡盡經擒治謹分別正法具疏上聞以肅軍紀事臣惟兵用命而後可以卽戎將愛兵而後可以用命粵兵餉薄至多八錢少僅六七錢此而或苛或索少失兵心其能免于囂然者之持其後乎所以臣于援兵扯旗告官一事廉訪實蹟先

參將領馮其原等職此故也然告官可耳一二百兵團詞何故卽
團詞亦或曰畏法耳數百人扯旗聚黨動稱激變又何故豈非挾
制官府示以無如何之勢乎雖經臣開示禁戢不逾日解散而漸
豈可長所以前疏云仍檄查緝爲首究治而確詢其故則以把總
黃萬權施鳳因選練汰革從中借隙鼓煽也雷大壯新募惠兵五
百濫收烏合中多盜孽如哨官唐海蔣清旗總曾相等倡先豎旗
謂不如是不足置將領于重罪也散兵曾勝等四十餘兇晝則歸
營夜則私劫乘機鼠竊狗偷而蚤已爲人偵識也臣密與署道臣
吳麟瑞廉得其名數十人但援師四集未便卽行拏治以驚擾兵
心隨議散遣行事間適按臣李雲鴻巡方適至其沉機決策與臣
等所見不約而同遂將惠兵四百七十餘名權委施鳳押發回籍
仍三次書手與嶺東道楊鴻參將施王政令散布防守用分其勢

設法密拏庶不致石玉同災而按臣慨然攬轡有惠州之巡共圖
弭此釁孽然據臣等初心亦不過擒治此三四十人而止耳詎各
兵散遣如廣標西山南山虎門等處或二百或百餘俱遵守紀律
無異獨惠兵抵惠聞分防之令自懷疑貳定求一處屯聚而抗逆
之萌伏矣斯時按臣已臨該府持法如山用謀不測與臣往返商
確行其操縱兼道臣楊鴻沉略一絲不露參將施王政智勇萬變
不窮借按臣閱操調集多兵伏備間隨于崇禎十二年七月初五
日接按臣手書言譁兵于初三日盡行擒獲隨據分守惠州參將
施王政報爲肅軍紀以靖地方事稱本年六月二十七日准分守
嶺東道楊參議手本蒙巡按廣東監察李御史憲牌爲援兵橫肆
日甚反側情形可虞亟宜懲處嚴防以肅軍法以靖地方事會牌
發道移職竊炤鎮兵在肇群咻緣事起有因本部院以所募惠兵

仍歸惠境在各兵獲懷土之願睦姻族之好其感激圖報宜何如
守法如何安靜上報國恩下敦梓誼爲是奈其中恪守法紀者固
不乏人而驕悍難馴稔惡不悛者亦自不少乃于到惠之次日因
營房一時難造本道與卑職再三商酌查有閑房及各祠廟觀等
處可以暫住者查示各數分派居住而把哨各兵卽抗不遵行隨
經本道卑職多方設處買辦竹木于南北二壇起造營房又爲按
期請糧其安插此輩可謂周且至矣乃把哨各兵必要聚在一處
每夜本總掌號三通點聚衆兵屯劄不動明示抗拒之形且三五
成群或強買民物或群毆居民或修舊怨或理新仇不一而足如
南沼磨船泊江干遂聚衆數十凌毆家人打上座船又如借取債
爲名搶打生員李發生家又如叛僕充兵強取賣身之契又要原
配身妻如姚舉人沙秀才等家被害可證也不法之狀種種踵見

乃蒙院臺密授方略本道面商布謀偵探乃知各兵將城內城外
士民等家殷實者登記編成一冊潛令數十人分歇城內人家約
期于按院審錄之日勾連外賊獄內重犯乘機聯合劫掠居民及
府縣二庫大爲叛逆礪刃磨鎗明示反狀以致城外人心洶洶驚
惶無措有搬移上船者有遷居下鄉者有城外棄家而入城內者
有城外挈貲而投遠親者且夕之間勢成鼎沸幸本部院預先密
授方略遇按院按臨惠府目擊景象可虞卽與本道卑職面商確
酌非預爲隄防必將決裂難制非痛加大創必至狂逞無已乃以
本院牌閣操爲繇調集遠近各兵四面分布水陸扼截晝則聚演
于教場夜則陰防于要處果于本月初三日五鼓各兵嘯聚大東
門外浮橋總路放銃吶喊揚旗露刃竟欲奪門而入卑職奉本院
行牌本道移會及密授方略與本府館并監紀面商機宜布置先

定號銃聲動四面伏兵並起水陸銃炮齊鳴城上拋石若雨街口
戈戟如麻各叛兵猶舞刀放銃拚死向前以爭勝負所幸各兵感
激院道府平日撫卹深恩惡戰不退當陣斬殺衝鋒首叛數名遂
皆土崩瓦解豕突狼奔當陣殺死溺死者七十餘名生擒者三百
三十七名并擒把哨之不法者哨官之投到者亦俱拏獲分別首
從定爲三等移解分守嶺東道研審立刻分發各府館先行痛責
監候憲令或將爲首者正以軍法爲從者重責擬罪協從者或姑
開一面押解回原籍州縣印官轉發親族鄰佑保領安插或仍與
食糧庶驕悍者知儆守法者益勸地方獲寧靜之福等因詳報到
臣該臣批援兵以訐官鼓譟新招惠兵實爲首惡復敢畏罪結聚
抗官擾民圖審錄日爲亂真不待教而誅者矣該道將同心畫策
盡縛諸兇具見制變勝略據冊首惡已確次惡中丘勝曾相黃昇

張惟等數十人固行劫訪告之有名者卽協從中賴熊羅耀曾仕
魁亦肇案之有名者似一時倉卒中尙多漏網仰嶺東守道確審
覆報有功員名卽將發去銀兩從優分別賞賚以示鼓舞仍炤另
牌行繳隨經行牌差官將首惡把總施鳳哨官唐海兵曾勝等四
十九名請令梟示又行牌將次惡中肇案有名萬興等十六名仍
擬首惡其餘六十七名係拒捕官兵如律確擬協從中尙多漏網
一并審確火兵先行釋放勿致縱枉去後其肇營惡把黃萬權已
經先日細打斃獄惡目兵張得勝謝興等十三人並廣標惡兵張
奇徐安等各經分別正法次等鈐束不嚴把總李嵩等三人監究
惟旗總曾相唐茂俊哨官蔣青現經緝拏務在必獲間八月初一
日隨據該道詳覆奉臣等批牌等因備移施叅將遵炤會同惠州
府理刑官將首惡正法二等會審招詳三等網打取保發落去後

續准施叅將手本並府縣官呈報梟示病故釋放緣繇到臣該臣會同巡按廣東監察御史李雲鴻看得援兵之訐官而謀也官實有以致之已經臣具疏糾劾是時也臣出一紙諭戢不旋踵解散歸營但告官而豎旗亂之階也歸營而夜劫盜之徒也揆厥所繇則把總黃萬權施鳳因汰革鞅鞅從中挑激新募惠兵中復有盜孽如曾相等喜亂猖狂怙終不改臣已廉得其名但令營把輩嚴行查訪不遽正罪者夫亦曰選練援旅衆至三千石玉雜陳恐生搖怖耳迨臣同按臣設法散遣回伍如東西南山廣標虎門北岸數十處或二百或百餘無不弭耳貼服獨惠兵四百餘其去也觀望其行也團結自知罪重不勝猶疑署道臣吳麟瑞多方駕馭設法排遣仍卽用其黨施鳳統之而旋以示不疑而按臣與臣同心密畫卽先巡惠州以制其釁臣又屢書該道叅使散防分緝又委

推官張正聲監紀伺察不時具報是臣等初意不過弱其勢使不敢逞擒其渠使不敢動拏此三四十人而止耳何施鳳等惡貫既盈天網不赦聞分布之令自起狐疑抗道將之文猶存鷹眼拒官擾衆伺隙生心至欲爲亂于審囚之日孰知按臣蚤飭道將已防之預而圖之密耶迨次日五鼓時伏兵四起中外就擒斬溺者七十餘被獲者三百三十餘幾于一網全收合營組首斯不足快地方之憤而禱驕兵之魄哉此卽悉付市曹有何足惜獨是當勢蹙被擒時有火兵以同寓並拏有隊哨以自投請死有散兵出首歸命有弱卒伏竄被按原情定罪似難以合營之血赤惠水之流也所以該道叅有三等之擬臣等慎重商確先將平日廉訪之名與今日首惡之案叅合既確如施鳳等四十九人立行梟示又並鎮下緝獲首惡黃萬權等十五名後先正法以定人心其次惡八十

餘名有搶掠拒捕之條總在不分首從之例據稱已斃獄中蓋天亦不欲緩須臾之死也若其他哨隊兵旗之自投歸罪及愚懦在營不能自脫者既經覆審兼取里排認保詳明宜開一面之羅量行網打之律散之歸農以全蟻息總仰體皇上好生之仁使三軍之士見殛罪而知威感畱餘而戴德以畏懷于不測之中而已是役也按臣李雲鴻識力淵沉謨猷煥發包涵駕馭聲色不大而卒收指顧之功當登車自命時已全操勝算矣分守嶺東道叅議楊鴻才能禦變識足籌機圖之再旬收之一旦使地方無池魚之殃而各兵無走嶮之挺伊誰之功原任署分巡嶺西道印務監紀援兵叅政吳麟瑞才誠雙合識力過人戡寧譁兵散遣歸伍使地方受救寧之賜惠州府知府梁招孟平日有子惠之恩臨事著干城之略推官張正聲聯合文武借箸守攻卓有可紀叅將施王政氣定神閒謀周智足因閱操而調兵則反側不疑聯臂指而合圍則遁逃莫漏致全營就縛脫者止三十餘兵而官兵居民不損一人真操萬全之勝算者矣當中外多事遠兵聞風語難之時得此一舉足明軍紀所應從優敘錄以示鼓勵者也若把總蕭龍等用命之勞首出諸弁已經臣從厚賞賚不敢上請伏祈敕下該部覆覈施行謹題請旨崇禎十二年七月初七日題奉 旨

請就近調補海道疏

題爲道臣病劇不能供職謹據實代題并懇聖恩俯准就近調補以重海邦事崇禎十二年六月十日據廣東布政司呈奉臣批據巡視海道按察司副使劉柱國呈稱職因二豎相侵四體半廢延醫診治藥餌無功乞早賜休致緣縣奉批地方倚重高賢仰調理寬期自可勿藥慎勿堅去思也繳奉此案查先奉本部院批據

本道呈詳內稱本職繇崇禎辛未進士起家部屬叨陞今職履任
以來值海政敝壞內寇外彘在在思逞一年之內拮据綱繆可謂
不遺餘力矣邇來仰邀憲臺威靈茲戢寇遁彘人效順海波亦頗
心違積瘁成痼一發而遂不可救也目下口語結塞左手足竟痿
痺不靈病勢至此真危于朝露矣海上何如地而可以閉門高臥
之人治之耶性命可憂情不能不請告封疆可慮勢又不得不請
告伏枕躊躇無可奈何因口授家僮具文哀懇蚤賜回籍調理緣
繇奉批該道雄才壯略海國長城地方不可一日缺者卽清恙時
感盛年調理立可平復仰暫假調攝徐出視事以慰輿情繳兼蒙
按院兩次批畱又經具詳再懇奉批前因職頂踵可效敢不仰承
栽培俯全身名而無奈元氣之虛者益虛肢節之痿者漸痿補洩

兩窮時醫束手非不加意靜攝而圭刀勢難猝効卽偃仰觀望痊
愈終難期覆餗實可慮爰敢不避冒瀆再詳籲懇伏祈憲臺立允
休致俾一線餘生蚤得歸里緣繇奉批據詳病情委頓勢難驟起
地方何賴仰布政司查議報就准該道移送同官鹽屯水利道按
察司副使魯棟結狀到司隨該本司左布政使姜一洪看得東粵
海道一官燭姦弭患非有全副精神者未易克肩斯任劉海道蒞
任及蒼釐剔無遺綱繆備至其清操宏略卓絕不凡兩臺所素鑒
者積勞成痼遂至一仆不起手足半痿藥餌罔功伏枕哀籲者至
再且三矣委難畱任伏祈俯賜具題俾得遄歸故里并將印務另
行委署總皆所以憐人才而固海邦耳等因具詳到臣該臣會同
巡撫南贛汀韶等處地方都察院右僉都御史王之良巡按廣東
監察御史李雲鴻看得粵東之海道此不可一日缺也會省三面

巨洋姦宄出沒入冬尤劇故巡事一不舉則把哨兵捕散無友紀其更難者澳彘以籬邊豺犬領袖諸番入市中國鳥言弁服畢集河下喜人怒獸攫之則噬而傀儡線索又爲奸輩所詐弄如去年吳維憲一事駭目駭心幸道臣劉柱國隻手撐持始存漢體今春完積逋之稅提銃兵之彘剖決如流海政煥舉而無如半體不仁之忽報也臥病兩月舉國如狂奸貪之流伺端橫集兼之藩司有展覲之行臬司爲虛懸之印守巡亦未補之官學道非他攝之署茫茫海邦僅一鹽道實手數篆冬春二汛一有不虞而咎臣等之不早計也庸有及乎故劉柱國之病臣等萬不得已而題而新道臣之調亦臣等萬不得已而請查得嶺東道叅議楊鴻長才偉略峻品宏猷萬斛經綸環應俱足且惠州無事府縣充濟咫尺廣海機務洞悉若移調劇任洵目前補救之長策而向後救寧之永賴也且不獨此也粵東道臣任事周年半載悉皆徙去楊鴻旦夕他移愈失倚借臣等鯁鯁過慮又計不得不出于此若本官資俸應在加陞之例吏部自有裁酌非臣等所敢知也旣經該司詳議前來相應合詞題請伏祈敕下吏部覆議上請准令劉柱國回籍調理如獲痊可聽該省撫按奏薦起用本道員缺卽以楊鴻就近調補另行推選嶺東道員庶病臣感浩蕩之恩而地方免曠廢之虞矣謹題請旨崇禎十二年七月初七日題十月初四日奉 旨吏部查議具奏

報明黎賊射死職官已經擒獲疏

題爲黎賊射死職官原犯已經擒獲謹據實題明以祈聖鑒事崇禎十二年正月二十日據廣東分巡海南道右叅政陳以誠呈稱十一年十二月初七日據瓊州府帶管撫彘知府余敬中呈據崖

州署印感恩縣知縣鍾麟郊申稱十一月二十四日據迴風嶺後
哨哨官梁才稟稱本月十七日恭遇冬至令節藤橋巡簡司巡簡
鄭繼高赴州拜賀二十二日旋司回至和尚溝突被一黨黎岐用
箭傷死彼時隊兵追趕賊逃歸嶺據弓兵報說印信行李幸賴未
奪等情到臣當批賊黎殺死職官失事非小仰道確查是否黎岐
及內奸勾引限半月擒縛渠首正法若復悠泄文武官卽候題叅
繳又該臣炤得崖州黎賊突出劫殺巡簡地方將總有司平時不
能飭備事後未見追緝止以逃遁歸嶺一報塞責玩寇殃民莫此
爲甚牌仰本道卽嚴行叅將及撫黎官並該州縣正官速督捕巡
總哨官兵協同鄉勇盟兵亟查前項黎賊的係某崗突出經縣某
營信地劫掠某人等家殺戮是否止此卽今曾否散遁務要責限
半月內捕獲真正渠黨并勾引奸宄報如逾限不獲卽將失事

捕巡總哨員役究解將領炤失事信地立行題叅去後本年五月
三十日據該道呈稱行據崖州申據把總符順道呈稱射死鄭巡
簡的係抱鮮岐村作賊離迴風二百餘里無人管束生岐等情申
明嚴緝間據崖州申報併准叅將移文共獲真賊一十四名內一
人對敵傷死解到那甘達儂那薨那茄四名到府該職逐一細審
那甘口供初時只見一人方巾騎馬來原不識是巡簡甘等之意
只在奪馬是我四人發弓親射其人落馬後見弓兵人等趕上始
知是巡簡官那薨那茄達儂一口招認相同詰問果誰箭傷則稱
亂射亦莫知爲誰手也據此口詞傷死職官實係此種黎人爲之
情的無疑罪應駢斬尙有九名在州令該州就近面弔九賊細審
正法間有原未同行者發給黎首領回准其刻箭自誓不許再肆
跳梁右營把總符順道迴風後哨哨官梁才防守疎虞雖已獲賊

雲原堂文集 卷之六
終難準罪並應究懲統候詳請憲裁定奪併究招詳等因到臣除
批回該道將見獲各賊嚴鞫成招并將失事總哨招報外該臣會
同巡按廣東監察御史李雲鴻看得瓊州之有黎患猶內地之有
土寇也或數十爲群伺隙截劫出沒無常在我將吏能守藩籬防
要害彼將畏戢蹲伏穴中耳查崖州巡簡鄭繼高之被射死也當
日信守旣闕其無人隨從各役又瞠乎其後故黎賊伏路冀奪其
馬而箭殞其生迨諸役追及賊即畏遁深箚該地把哨符順道梁
才等凜于責限隨獲兇手那甘等一十四名除射官渠首應行斬
示餘猶審明分別以寓羈縻大抵瓊之去崖幾七百餘里向叅將
移駐崖州故爾建威消萌今高坐瓊城未免把哨懈怠致黎得乘
釁殞官雖地方別無殘損而漸固不可長也在叅將湯允文與署
州知縣鍾麟郊均難辭責惟是兇渠已獲多人餘黨亦經伏戢念
功過相準俯從寬政是在皇上如天之仁非臣等所敢議者至于
叅將湯允文臣已檄駐崖州用勤彈壓再不得偷安瓊郡以貽寇
禍于地方也旣經該道查詳前來理合具題伏祈敕下該部覈議
施行謹題請旨崇禎十二年七月初七日題十月初四日奉 旨
該部核議具奏

題明地方異常災變疏

題爲地方異常災變謹據實奏聞仰祈聖鑒事崇禎十二年七月
初三日據廣東雷州府徐聞縣申報本年五月三十日颶風暴雨
傾圮倉庫城垣門樓綠繇又據該府理刑帶管海防推官關應春
雷廉叅將吳宣猷各詳報颶風打壞白鴿寨捕舵陳熹等戰船綠
繇各到臣俱經批道覆查確報間該本道看得天降災異颶風爲
變雷廉二府被災則雷州尤爲甚也廉屬已報者潤洲右部沉壞

兵船一隻淹死船兵八命雷屬白鴿寨損壞兵船十餘隻并溺死
二兵卽倖全者其間亦略損壞而海遂徐三縣城垣衙宇等項并
民居廬舍多稱傾圮禾苗焦爛收成失望民心惶惶睹其情詞誠
可爲痛心也除批行雷廉海防官并各縣查議外緣係地方災異
擬合詳報等緣繇到臣除一面行道分別賑卹及補造兵船外該
臣會同巡按廣東監察御史李雲鴻看得粵以山海爲國其地不
錯山則瀕水無所謂周原臚臚也而土曠民窮在雷廉之瘠尤
甚雖從前災傷亦所時有或襟江者苦潦而枕山無恙或附嶺者
苦旱而濱海有收民間尙可支持且夕以完國賦乃今年三四月
間該地旣值雨澤屯膏艱于種植海上奸民群起爲盜聯檣並艘
流突鴿門邊海之民所在騾騷臣與按臣多方勦撫始獲招安解
散邀有戢寧未幾而馮夷之災告矣據報雷郡五月三十日颶風

大作暴雨如傾一日之間水深數尺官民衙舍盡被傾頽寨港兵
船悉爲飄破鹹水倒灌陂塘阡陌盡成巨澤人心惶惶莫必其命
當此徵輸日煩民生日蹙之日丁此降割化儺滿目饑饉傷心嗟
嗟予遺何繇糊口而況乎船艖漂沉城垣崩陷守防之具半委波
臣補救之方咄嗟難辦此皆臣奉職無狀所致除痛自修省席橐
待罪及督行該道轉行各該有司減訟緩征設法賑恤以安流離
措餉修守以資防禦其廉瓊被災地方已報者似無大災未報者
尙俟確覆獨是雷州一府三屬城幾爲沼民其爲魚無食無居尤
爲異變謹闔詞題報伏祈敕下該部查核施行謹題請旨崇禎十
二年七月初七日題十月初四日奉 旨該部知道

雲隱堂文集卷之七

相州 張鏡心晦臣甫著 子潛編校

奏議七

起解鏡器疏

兩廣總督臣張 謹題為再酌調遣軍機并資內備實用事崇禎十二年三月十八日准工部咨該兵部題前事內開一福建廣東前各派兵三千亦令折銀起解今查二省善用紅彝鏡器可以分發守城當改行該督撫各解鏡三百門每門選善製藥及點放者數人與俱速發至時分布州縣養以厚餉約二門可固一小城四門可固一大城是兩省六百門可分大小二百城也其先行折解之銀如已在途亦准作京邊正項其人鏡所需另行措解不得遲延等因崇禎十二年正月十四日具題十五日子時奉聖旨左光

先等聽洪承疇酌調甘寧兵將福廣人鏡江西等六處弩藥及保廢閑查贓罪復海運積烟煤俱如議飭行其餘仍遵前旨欽此欽遵咨報前來該臣會同巡按廣東監察御史李雲鴻看得紅彝大鏡原非粵地所有惟粵先年曾倣其式鑄造防海屢收成效而憑城禦侮尤爲中國長技之最蓋其鏡體宏大摧堅及遠爲寇賊所憚當戎馬馳驅人情惘疑之時憑高俯擊如雷霆之迅賊卽披猖萬狀自當應聲隕潰城頭勇氣可增百倍中朝採集羣策遠行調取分布近畿以資城守洵自固制敵之勝算而一時百世之長策也乃臣自接咨後再三圖畫謂畿輔省會郡縣城有大小而鏡亦因之夫城大則鏡非二千斤上下不足配雉堞而壯風雷以小予之而不適也城小則鏡千斤內及五百斤上下可以稱施若城垣單薄而用二三千斤巨鏡卽城慮震隕又何能制敵者故城

小而大予之亦不適也所以臣酌三千斤以下二千一千斤以及六七百斤四五百斤者配勻上解務足稱大小城郭之資而不虛乎閩部蒿目之全畫耳是役也粵鏡之大倍于他省故鑄之難解之費亦倍于他省然不敢不竭蹶催僱以資急用將前鏡分爲三運委都司今陞香山叅將王化行于見貯省會防禦舊鏡揀選濯磨試放堪用者共得一百門以爲頭運嗣容補鑄以固地方先委指揮施炳然管押于本年七月二十八日起解而二運三運彝鏡二百門卽以新鑄者委功授都司何吾疑指揮蘇萬邦相繼輓輸總不出十月內盡行起解至水陸搬運雇募裝載船價臣業行司措給而水陸人夫已量矧解京軍需事例填用勘合一應俱從樽節不致妄費若製藥點放兵匠每運臣只酌用五十人以一人而兼二鏡可以教演彼地之人使之習練共圖捍禦也至原咨語意

似備近畿山東之用恐鑿鏡體重途長迫解京而再分發或至滋費誤時倘若酌量北直河間山東濟兗臨德等府停頓以俟隨地分布則抵京陸運之費可省而有事應急之著亦可速行演訓蚤收捍衛之功也合用鐵炭工料并應支用錢糧統俟鑄完補借舊鏡與解還新鏡完交之日另行核實報部開銷除將起解各鏡斤數及點放兵匠姓名咨報兵工二部外理合題報伏祈聖裁敕部酌議施行謹題請旨崇禎十二年八月十一日題十月二十日奉旨該部看議具奏

懇籲終養疏

奏爲聖明孝治方篤微臣親老堪憐謹據實懇籲天恩俯容終養以寬子罪以勵臣忠事臣惟古帝王善世美化成大順之休不過臣報君子報親而已矣故求忠于孝移孝作忠未聞離孝而課忠

也恭遇我皇上至孝性成因心立極追崇聖母錫類普天又布孝經小學以風漸之于凡廷臣中弗若于親者峻誅無錯其欲致于親者復曲體不遺如臣屬道臣朱又煥終養一疏經臣朝上夕允斯非皇上體臣之特恩而孝治天下之盛典哉乃臣之親之老視又煥更甚臣之于役視又煥更遠臣思親約結之心視又煥更苦臣亦子也爲人祈終養而自忘其養是爲何心子輿氏云不可以爲人不可以爲子而可以爲臣乎臣父今年七十九臣母今年八十皆過古稀之年入于大耄往猶勉臣以仕臣卽馳驅之下聊足自慰今年正月朔臣父臥病枕席手書念臣不勝惋切臣得報在三月初旬神魂驚悸焚香告天願移臣年以綿親壽畢竟近郊主憂臣辱而不忍發誠權于公私緩急之間不敢不以大義自裁也八月二十二日臣父又寄臣書云近日暑泄繼之以痢言之

恐增懷念親老病切見當審裁臣披讀未竟涕汎瀾不能自已念臣今日得有此身供皇上驅策從親來也臣非親無以有今日親非臣無以終餘年八十老人殘年有幾卽起居康健朝夕承歡喜懼交駢千金一刻況臣父齒零臣母目眊衰恙纏綿日夕倚闥因病愈思因思愈病身非金石何以能堪若是父念臣而臣忘父父恐臣懷念而臣不體父之懷念貪戀祿位不反本根禽不如烏草不如葛皇上亦安取若臣而用之且臣近日焦愁之極虛火上灼形枯如腊耳鳴如雷料理大計諸冊都從床褥間支離紛披嗟乎事君之日長事親之日短忠孝大事臣敢茫昧正恐高堂萬里百憂煎心水竭火焦溘然朝露是臣事親之日短而亦虛事皇上之日長而得促臣獨何心能不仰顙况臣父生平讀書教子敦踐大義非猶世人煦煦之私也臣十八載中外厥歷從未得事親一日

臣父未嘗以齒之暮罷勗其子克厥終始一以仰報聖明爲言而忽爲此語則其血氣之衰無如何之光景可想見也此臣之所以鬱抑悲苦而不能已于陳也至聖朝功令不輕予諸臣之請無非杜規避耳臣受事時紅鬃楚寇及閩粵高雷間流氛出沒臣皆殫心戮力次第戡定臣何敢規避目前兩粵粗號救寧臣又何所容規避猶記臣在班行時原任太僕寺少卿宋師襄以終養蒙允近邸報中戶部主事張美含亦以終養解職似又不止一又煥然者伏祈皇上憐臣犬馬下情敕部議炤諸臣例解職終養庶聖明孝治天下之心與又煥諸臣一視臣與臣親當共祝聖壽無疆且益圖報于世世矣謹具奏聞伏候敕旨崇禎十二年九月十三日題十一月十五日奉 旨張鏡心身任粵疆何得以私情陳請著卽出供職該部知道

雲隱堂文集卷之七
薦舉考選官員疏

題爲爵人之權宜公器使之道宜審等事崇禎十二年八月初二日准吏部咨文選清吏司案呈崇禎十二年三月初七日奉本部送吏科抄出該本部覆御史宗敦一條陳考選銓司官生三款緣繇三月初五日奉聖旨是今後科道部翰員缺在外俸滿糧完推知着該撫按確覈治狀在內俸滿謹恪中行等官着該部院確核才品列名請旨行取方准離任考選仍候面試裁定不稱者撫按部院論處吏兵各司亦係部屬卽於此中酌量公廉敏練者用之俱不許仍前預定把持僭競紛囂違者拏問重治欽此欽遵抄部送司案呈到部備咨前來依經案行廣東布政司卽便會同按察司守巡各道詳查確核去後該本司覆查遵將推官孫襄填註考語理合揭報等因具呈到臣該臣會同巡按廣東監察御史李雲

鴻看得考選一事經皇上屢旨申飭誠有鑒于把持紛競之弊而欲破之也覈治狀于撫按定去取于宸衷必欲得真品真才而耳目股肱之典綦重綦嚴矣臣等謬叨衡吏值茲詢事表言之典敢不盟諸寤寐矢之天日少竭以人事君之誼以求無負側席盛舉乎始之飭司道接舉已極鄭重臣等再加甄別寧嚴勿寬寧核勿徇憂憂乎難之就議論僉同聞見確據之府佐得一人焉則廣州府推官孫襄也本官品格霞標才華層迥旣正方而宏深復精明而沛達剖決如流而囹圄空民不冤矣怨勞不避而鑑衡定吏知奮矣權勢不撓左右不貸各屬之苞苴不行風采肅矣耗蠹盡剔俸贖盡捐興學造士之美盡舉子惠敷矣諸如籌糶戡亂墾荒恤民佐臣等外勦內撫之功又未易更僕焉允稱大受之才可備清華之選者也除推官中歷俸未及與政績未甚表著者不敢概敘

外謹合詞具題伏祈敕下該部再加覆議如果臣等所言不謬將
推官孫襄欽取考選庶吏治知奮而民生其有賴矣謹題請旨崇
禎十二年九月二十九日題奉 旨

又

題爲爵人之權宜公器使之道宜審等事崇禎十二年八月初二
日准吏部咨抄出該本部覆御史宗敦一條陳考選銓司官生三
款緣繇三月初五日奉聖旨是云云欽此欽遵抄部送司案呈到
部備咨前來依經案行廣東布政司即便會同按察司守巡各道
詳查確核去後該本司覆查遵將知縣汪運光尹奇逢劉熙祚等
填註考語理合揭報等因具呈到臣該臣會同巡按廣東監察御
史李雲鴻看得議考選于縣令難矣議縣令考選于多事之日更
難矣核其品端又欲其才之大爲皇上任艱鉅也稽其治最又覈

其糧之完爲軍國効飛輓也粵吏林林司道求卓異如格者不多
得臣等披沙揀金矢天對日不拘途轍不徇情面相與精擇而慎
拔之得三人焉其一爲東莞縣知縣汪運光才華瑰麗氣骨淵涵
萬斛經綸逢源四應一以慈和凝整出之如刑清訟省賑舉備修
民安衽席之休見其惠廉立威生令行禁止首挾衣冠之盜見其
力興文飭武繕器詰戎瀕海無鯨駭之波見其畧剖紛雪冤抑強
扶弱兼攝無塵埋之案見其敏至夫紳服矣士化矣民歌誰嗣矣
寇知賣刀矣感戴之殷若出一口見其誠它如稟承功令清屯糧
一萬石溢契稅數百金修堤城可百世又其急公之誼一從軍國
起見者乎歷查驄使俱以國士期之首刻屢膺公論符合宜擢禁
林用昭偉受其一爲茂名縣知縣尹奇逢氣格修然如百尺之幹
挺立風塵墜荒訓耕畱心農事則本政舉興利除害加意撫綏則

民隱悉革耗捐贖鼓舞好義則公事勇剖紛排難釐剔奸究則風力著一聞功令之頒搜括以千餘金計矣積貯以六千石計矣訓兵以五百名計矣雉堞重新器械畢繕有身視民家視國之遺風焉夫高涼難地耳土曠民寡厥賦維艱得本官之開闢生聚光景忽易循績安可誣哉應掄侍從之班用竟光明之奏其一爲興寧縣知縣劉熙祚寒鐵爲顏陽春在抱注厝極是嚴簡而條理一絲不紊和于民而肅于吏厲于盜而篤于良折獄之明如炤徵收之弊盡釐畱心保甲實實舉行訓演鄉兵條條有緒初非鶩赫赫之名也源清而閭閻食其流鏡懸而魍魎遁其跡查緝開道般而奸宄革心桑麻就業山城之風俗翕然矣惠介萬山中與閩錯壤它邑無歲不寇無歲不兵以問興寧無有也如此官者可首嶺東一路矣當聖明破立賢之格允宜超選清華仰信明綸者也伏祈教

下該部再加覆議如果臣等所舉不謬將汪運光等炤例欽取考選庶大典光而吏治蒸蒸日上思奮矣謹題請旨崇禎十二年九月二十九日題奉 旨

題請道臣移駐要地疏

題爲道臣移駐要地事有關係議難中止謹再題請以重地方事竊炤廣東分守嶺南道轄廣南韶三府延袤一千五百餘里清遠一縣適當其中密邇楚藍臨高紫等巢及連州排徭今幸戡定撫綏無有警息但番清從龍諸縣界中有盤古十八峒深山廣箐二百餘里夙多不逞出沒自崇禎四年勦後今復盤據千人不時肆掠知府余自怡保撫茫無實效臣恐勢大黨堅又成九連二源之禍于今年九十兩月議勦撫並用斬厥萌芽正在同按臣拮据料理而清遠卽扼要之區也所以前南韶道臣王夢錫有守道移劄

清遠之請誠有見乎本地空曠既在守道之轄中且道署舊設無煩建造之重費也迨臣批二司會議隨據詳覆無異咸謂守道夙居省會今職掌不易而但移駐以資控扼端可鎮千里之江流杜一時之竊發等因到臣卽備臚往復詳議會疏上聞殫其縷縷矣但原題疏中舉肇慶知府蔡秋卿陞補守道今幸吏部已行推補王道元可謂得人而前疏或恐不覆則守道移駐之效不可望矣總之嶺南守道職掌如故清遠衙門完備如故既無增費更建之勞而該道在省會爲林立多官在清遠爲中流一柱更得居重馭輕之勢况撫勦峒賊又今多事之日得力一著哉謹會同巡按廣東監察御史李雲鴻合詞再請伏祈敕下該部查議如果臣等所言不謬俯將守道移駐清遠俾炤臣前疏所議該縣與連陽四州縣兵馬刑名就近統轄則重地有人三郡克資兼領所裨巖疆似非眇小矣謹題請旨崇禎十二年十一月十六日題奉 旨

糾劾不職方面官員以備考察疏

題爲糾劾不職方面官員以備考察事崇禎十三年天下諸司復當大計臣叨糾察之責所屬方面宜有叅處竊思監司位守令上察吏籌兵內撫外戢厥任艱鉅一不稱而害流合屬禍延一路此不可姑息爲也臣受事二載已特糾二員目今陞遷事故者甚衆見在地方不滿七人耳然其治行卑庸才情昏濁身去而職虧使在任痿痺之政爲後官攢眉嘔心不能驟挽則白簡之問豈有貸焉謹就司款所列與採訪的確如原任糧儲道叅政告病馮時來其人者固不能遠于痺幽之典也一該道足疾蹇痿舉止艱難卽謁見兩院不能成禮下隲吏屬不能周旋尸位一年有似木偶一望頽然何以表率人倫一該道自到任以來衙門不封不掩任奸

蠹恣行出入殊非法紀一該道以開墾爲名濫行委用指揮宋人
豪劉國興謝蘭林鳳騰等或走雷廉或走瓊州或走高肇韶州借
查屯名色恣行漁獵經署道申詳兩院卽嚴行拏禁發廣州府究
擬見今未結一該道百務廢弛錢糧不比歲叅三分截叅九分法
度盡廢署道代行查比嚴追本色今始漸完若經久任則屯糧大
壞不可收拾一該道承屯田改折一半之後衛軍四五月紛紛
告借倉穀徇情濫發以致常平備賑倉穀放借一空經年半粒不
還倉廩盡虛流弊無窮一該道署事嶺東道偃臥署中公門不閉
濫收禮儀屬官傳笑此一臣者耳目迷盲衣冠木偶防簡疎而狐
鼠縱橫差委濫而軍民魚肉致屯徵廢關倉廩單虛大有虧于職
掌者所當炤罷輒例冠帶閒任者也伏祈敕下該部再加查訪如
果臣言不謬將馮時來炤例處分庶監司知惕而計典其益肅矣

謹題請旨崇禎十二年十月初一日題奉 旨

請復查叅欠餉舊例以儆積頽疏

題爲粵餉萬分空匱粵兵旦夕莫支謹據實上聞祈復查叅舊例
以儆積頽先直糾蠹餉貪官以肅法紀事崇禎十二年十月初四
日據廣東布政使司呈詳奉臣案驗准戶部咨戶科抄出該本部
題覆廣東巡撫張題前事內稱兵餉壓欠數多仍炤舊例查叅等
因崇禎十一年四月二十九日奉聖旨該部知道羅憲陞著革了
職及本內有名衙蠹該撫按嚴提究擬具奏欽此欽遵抄出到部
看得粵東本地糧折銀歲以餉本省并協濟粵西水陸營兵糧自
三十八年始炤京邊考成節年完解無逋今該撫疏稱于四十三
年因嚴叅報罷不虞各屬因罷叅而節年遂逋兩省餉銀至二十
餘萬內新興一縣五年之中積欠粵西餉銀一萬三千餘兩玩叅

罰之不及置軍需于膜外除該縣知縣羅憲陞焚餉情弊臣等已遵旨行該撫提究外其餘有欠多各官再聽通查指叅重治仍勒催完解庶玩吏惕於功令而餉額無敢虧逋矣嗣後兩省餉銀合如撫臣所請炤京邊例每年終具疏題叅仍造完欠細冊報部以憑核覆可也等因崇禎十一年六月十七日奉聖旨是欽此欽遵抄出到部備咨前來煩將歷欠府州縣各官職名并陞任見任逐一嚴查叅處仍督令該布政司備造完欠細冊報部以憑覆請等因准此案驗行司即便移行道府州縣一體欽遵外今炤崇禎十一年內應徵該年兵餉并帶徵八九十年分兵餉完欠分數行據廣州等十府并羅定州縣陸續造繳前來隨查先奉本部院案驗內開崇禎六年十二月十七日准戶部咨爲酌定考成之法等事內開見徵一應新舊本折錢糧務完十分如有不完卽炤新定考

成例叅罰一見任官未完一分以上降俸一級二分三分降職一級四分五分降職三級俱戴罪督徵六分七分降職三級赴部調用限文到三月內全完方准開復八分以上革職爲民亦限文到三月內撫按查明有無別情另行奏奪過期不完本部題明行文吏部降革如例閩蜀兩廣雲貴姑再寬限一月帶徵亦准新定罰例分爲三等以二分計之未完五厘以上者炤未完一分例降俸一級未完一分及一分五厘以上者炤二分三分例降職一級通無完解者炤未完四分五分例姑降職二級等因題奉欽依備咨前來案驗行司業經通行欽遵外今該本司左布政使姜一洪查將各府州縣造報各官經徵崇禎十一年分帶徵八九十年分兵餉完欠分數遵炤近奉新定考成例覆覈得崇禎十一年分應徵該年兵餉及帶徵八九十年分未完兵餉各官見徵全完帶徵完

及二分以上者則有東莞縣見任知縣汪運光新會縣降級去任
知縣譚景行從化縣見任知縣蔣朝陽新安縣見任知縣彭允年
陽山縣見任知縣李子章連山縣見任知縣余懋儼南雄府督徵
見任知府吳之京保昌縣陞任知縣黃中雅始興縣接徵調任知
縣蕭琦仁化縣陞任知縣費映環龍川縣丁憂知縣龍相興寧縣
見任知縣劉熙祚長樂縣見任知縣黃景明程鄉縣見任知縣陳
燕翼惠來縣見任知縣陳咨託普寧縣見任知縣張瞻韓恩平縣
陞任知縣宋應昇接掌印見任知縣黃扉茂名縣見任知縣尹奇
逢電白縣陞任知縣周日旦接掌印見任知縣徐子瑜信宜縣見
任知縣趙珽海康縣陞任知縣陳燧徐聞縣見任知縣吳國斗雷
州衛見任指揮馮名世合浦縣陞任知縣向宸會同縣降職去任
知縣夏鑄鼎接掌印被劾知縣許之曾羅定州被劾知州鄧三才

東安縣見任知縣曾光祖以上全完各官相應優敘見徵完及九
分以上帶徵完及二分者則有廣州府督徵見任本府理刑推官
孫襄接掌印見任知府余自怡經徵南海縣丁憂知縣蔣茶番禺
縣見任知縣謝泰宗順德縣見任知縣王寢大香山縣見任知縣
毛毓祥增城縣見任知縣陸清原三水縣見任知縣高其昌新寧
縣見任知縣余應郊稅課司任滿大使雷世富曲江縣陞任知縣
潘復敏翁源縣見任知縣朱景運乳源縣見任知縣蔣鳴鳳海豐
縣見任知縣李立永安縣見任知縣劉廷祚潮州府督徵陞任知
府劉柱國署印見任推官王鼎鉉接掌印見任知府聶文麟潮陽
縣陞任知縣漆嘉祉大埔縣見任知縣薛宏序肇慶府督徵見任
知府蔡秋卿高要縣丁憂知縣張源思陽江縣署印恩平縣陞任
知縣宋應昇接掌印見任知縣孫自修陽春縣見任知縣方銓高

明縣陞任知縣郭斌選署印本府見任昭磨張宗燦封川縣見任
知縣周洪德高州府督徵陞任知府姚繼舜署印見任推官丁繼
善接掌印見任知府黃朝英化州署印本府見任捕糧通判董其
仕接掌印見任知州趙士錦瓊山縣見任知縣林尙春臨高縣陞
任知縣許真儒接掌印見任知縣胡宗瑜定安縣見任知縣廖錫
蕃樂會縣陞任知縣李時興以上各官相應免議又督徵未完一
分以上帶徵完及二分者則有韶州府陞任知府熊士達雷州府
給繇知府朱敬衡以上二官應紹未完一分例降俸一級又督徵
未完二分三分帶徵完及二分者則有惠州府見任知府梁招孟
廉州府降級去任知府鄭抱素瓊州府降級去任知府余敬中以
上各官俱應降職一級內知府鄭抱素余敬中已經降級去任應
候補任日昭降又查見徵已完九分以上惟帶徵未完二分者則

有海陽縣見任知縣桂啓芳揭陽縣見任知縣張明弼饒平縣見
任知縣丘金聲鎮平縣見任知縣胡會賓廣寧縣見任知縣王時
英吳川縣陞任知縣童兆登署印化州見任州同滕之鑑接掌印
調任知縣王泰徵陵水縣被劾知縣范維垣昌化縣病故知縣林
大志以上各官例應降職二級內除被劾病故免叅外內廣寧縣
知縣王時英欠止七錢二分似應免議又吳川縣一年三官計日
分美知縣童兆登六箇月零二日未完一分例應降職一級已陞
刑部廣東司主事應行見任衙門昭降署印州同滕之鑑三箇月
零二日未完五厘例應降俸一級接掌印知縣王泰徵受事二箇
月未完三厘三毫相應免議又見徵未完一分以上帶徵完及二
分者則有清遠縣陞任知縣胡開文連州見任知州王立準英德
縣見任知縣吳永澄歸善縣陞任知縣傅汝爲澄海縣見任知縣

方聞讚儋州署印本府見任推官羅其綸接署印昌化縣陞任訓導汪若霖見任通判徐壯崖州丁憂知州呂嗣綽接署印本府見任通判徐壯感恩縣見任知縣鍾麟郊以上各官例應降俸一級內清遠縣知縣胡開文已陞北京刑部主事歸善縣知縣傅汝為已陞南京兵部車駕司主事俱經離任合行見任衙門炤降儋州一年三官署印計日分笑推官羅其綸八箇月未完一分零四毫炤例降俸一級其通判徐壯訓導汪若霖并崖州一年三官內丁憂知州呂嗣綽四箇月零十七日通判徐壯二箇月知縣鍾麟郊五箇月零十二日俱止未完數厘相應免議又見徵未完一分以上帶徵未完二分應從重以帶徵未完二分降職二級者則有平遠縣見任知縣胡有英又見徵未完二分三分帶徵完及二分應從重以見徵未完二分三分降職一級戴罪督催者則有河源縣

見任知縣方秉正四會縣休致知縣曹之建接徵署印封川縣被劾儒學教諭黃士標新興縣革職知縣羅憲陞署印病故同知張元景接掌印見任知縣張復普開建縣署印高要縣陞任縣丞黃玉鉉接徵候調去任知縣沈起蛟接掌印見任知縣袁嘉命澄邁縣彼劾知縣田窩國接徵署印本府見任經歷尹士亮以上各官除被劾病故休致免叅外其新興縣知縣張復普四箇月零十日未完一分以上應炤例降俸一級開建縣一年三官署印縣丞黃玉鉉已陞廉州衛經歷知縣沈起蛟已經聽調見任知縣袁嘉命兩箇月零五日澄邁縣署印經歷尹士亮三箇月計日分笑各止未完數厘俱應免議又見徵未完四分五分帶徵未完二分相應從重以見徵未完四分五分降職三級戴罪督催者則有和平縣見任知縣張逢慶萬州見任知州張瑤市舶提舉司署印都司候

任經歷姚士錡林調鼎接署印廣州府見任捕盜通判吳正億傳
羅縣見任知縣洪啓烜靈山縣陞任知縣江昌世以上各官俱應
降職三級戴罪督催內市船司一年三官署印計日分篆姚士錡
四箇月二十一日未完一分六厘林調鼎三箇月未完一分吳正
億四箇月未完一分四厘以上吳正億應行見任衙門降俸一級
經歷姚士錡林調鼎俱係候缺竢實任降俸靈山縣知縣江昌世
已陞廣州府同知應行陞任衙門炤降又見徵未完六分七分帶
徵未完一分以上相應從重以見徵未完六分七分降職三級起
送吏部調用者則有樂昌縣降級去任知縣黃鶴騰署印南雄府
已故推官蔡侃賢接署印陞任本府推官許璟接掌印見任知縣
羅銘鼎長寧縣丁憂知縣陳國禎接署印本府見任同知朱治隆
連平州已故知州牟應受接署印本府見任管糧通判袁觀光海

南衛見任指揮崔斌遂溪縣被劾勒令致仕知縣陳時瑞署印陞
任縣丞施王佐接徵見任知縣慎思永以上各官除被劾病故免
叅外內樂昌縣署印推官許璟四箇月零十日計未完二分三厘
例應降職一級今已陞北京刑部主事應行見任衙門炤降見任
知縣羅銘鼎到任一箇月零十一日未完七厘相應免議長寧縣
知縣陳國禎掌印九箇月計未完四分五厘例應降職三級但本
官已經丁憂回籍應候補任日炤降同知朱治隆署印一月零三
日未完五厘相應免議又連平州署印通判袁觀光署印二箇月
零十日未完一分炤例降俸一級但受事日淺相應免議遂溪縣
署印縣丞施王佐七箇月零二十三日未完四分七厘例應降職
三級但本官已陞廣州左衛侯任經歷應行見任衙門炤降見任
知縣慎思永未完一分四厘炤例應降俸一級但本官到任二箇

月零十日受事日淺相應免議又見徵未完九分帶徵完及二分例應以見徵未完革職爲民者則有欽州開往去任知州薛安唐文昌縣署印本府陞任同知楊時熙接掌印見任知縣張安恭內除去世任薛安唐免參外內同知楊時熙三箇月二十日未完三分以上例應降職一級知縣張安恭八箇月零十日未完五分以上例應降職三級俱戴罪督徵又見徵未完十分帶徵未完二分應以見徵未完從重革職爲民者則有陽春所掌印肇慶衛指揮僉事張兆鸞并前未完六分以上南海衛指揮崔斌俱係武職經徵兵餉又協餉一項龍門縣知縣戴上觀未完十分德慶州知州王際隆未完四分合候本部院酌裁已上應罰官員與例相合者俱照例查參例中有未及詳載如一縣未完四五分而署印三四官者似應以月日淺深計美分徵參罰庶免槩累緣係事干參覈本

司未敢擅專仍候本部院裁酌具題擬合呈詳等因到臣該臣會同巡按廣東監察御史李雲鴻看得兩粵軍餉三軍續命之丹也積邁數萬庚癸之呼嗷嗷可虞茲蒙部覆嚴通查重治之條炤京邊參核之法咨文中又致詳于陞任見任逐一參處鯁鯁乎中外一視而加意軍糈者最明且悉矣臣敢不一遵功令痛加振刷惟是初舉之法人情觀望且粵地遼廓報冊延緩直至九月中該司始核報十一年參罰各官分數名冊前來再加覆覈無異如見徵全完帶徵及二分以上吳之京等三十員如期飛輓粵兵沐膠續之恩大裨飽騰地方受救寧之福應行紀錄見徵完九分以上帶徵完及二分余自怡等五十二員應行免議其完不及格文武各官熊士達等三十七員置兵食于意外負催科于額中餉缺則軍譁矣兵離則衛解矣以地方安危之急爲急者不應作如是觀也

雲原堂文集 卷之七
既經該司遵奉部文依京邊例分別開列罰降調革戴罪督催前來合應照現任陞任一體題叅以信功令者也至于協餉一項不過兵餉中之一款耳數止七萬其完欠應准折筭合將欠十分者准照五分欠四分者准照二分例降治者也中有病故及被糾革休林大志等十三員似應免議除將該司繳到府州縣見徵帶徵兵餉協餉已未完數目冊二本咨繳戶部外理合具題伏祈敕下該部再加覆覈上請行臣等遵奉施行謹題請旨崇禎十二年十月初八日題奉 旨

議勦崗寇疏

題爲崗寇流毒日熾勦戢勢不容緩謹先據實報聞仰祈聖鑒事竊粵東邊腹皆山寇盜出沒連年蠢動然皆旋就芟除頗稱寧宇惟清遠從化番禺增城諸縣之界有謂盤古西坑正逕車頭三坑田屋簷水等十八峒盤踞萬山之中迂迴數百里內渠外宛勾連嘯聚數十年來蘊成盜藪崇禎四年間曾經鵬勦擒斬賊魁鍾國讓等餘黨竄伏無何又復四出劫擄廣州知府余自怡曾議督行各縣撫綏不效附峒鄉村民居日懼劫擄遠不具論近如崇禎十二年正月二十九日以後據番禺清遠從化等縣各報山賊焚劫鄉村事到臣隨嚴批嶺南兵巡等道及廣州府督行緝捕間查十八峒在廣省之中深山密菁久爲盜據此防彼出官兵防守莫知其鄉其勢已成終必決裂經臣與按臣李雲鴻往返商確僉同謂非勦撫並用一清百餘年之窟難得安枕卽議委總兵官許自強率都司馬吉翔帶領標營各官兵四千員各設處行糧稿賞以嶺南巡道蔡秋卿監軍行勦該臣會同巡按廣東監察御史李雲鴻看得海內寇賊之禍始之赤子弄兵終于蒼生流毒涓涓不塞

漸爲江河良可鑒也茲十八峒在東粵腹心之中只以山菁深嶮
紆迴四五百里民棄盜取遂種逆孽乃百餘年來深峒之陸梁與
烏蛇爭處峒口之氓蚩任土宦籠絡但無大害何事尋兵所從來
久矣迨後內奸外宄互相勾連逋逃之藪胎厥厯豕元年四年雖
勤大勦並經上聞而鵬戮一二負固自若迄于近年無歲不劫臣
征楚凱旋時曾欲便兵勦制以折其萌因知府余自怡一力任撫
姑觀其後不料兩年來內聚幾至二千外掠遂無虛日府縣之保
甲不行撫綏之德意有負近且揚旗搥金謀及城圍是尙可姑息
待哉臣檄鎮道詳議覆報僉同而按臣尤決策勦創一勞永逸若
不可須臾待者誠鯁鯁于久長之計也臣隨檄總兵官許自強督
兵嶺南巡道蔡秋卿監軍以都司馬吉翔等分道行勦是役也瘝
毒肩背之中與外勦不同以勦勒撫以撫成勦先之以檄文開之

以生路按兵徐進制其死命但有歸順立付縣官收寄外地不許
輕殺一人但有茅舍姑與存留不許焚燬半間惟拒敵抗師及有
名大頭目出掠害民者擒而戮之務期決藩以夷嶮窟招脅以廣
皇仁迨勦平之後籍其土田編之保里仍處降衆聽其歸耕但隸
官家版圖便成向化黔首則腹心之殃所蘊隆而不破者或可望
邀有寧宇也理合具題伏祈敕下該部查覈施行謹題請旨崇禎
十二年十二月十三日題奉 旨

官兵協勦山寇疏

題爲惠潮山寇竊發官兵奮勇擒斬餘黨潰散見在協勦期盡殲
滅謹先報聞仰祈聖鑒事竊炤粵東惠潮山寇素多伏莽崇禎十
二年八月二十日據惠州叅將施王政報單稱有流賊一百餘徒
突劫西坑戴家男婦被擄一十餘口等情到臣臣卽會牌按臣督

行施王政統率各總哨官鄉兵相機勦禦去後十月十五日又據
惠州叅將施王政報單據把總蕭龍等飛報各賊二百餘徒又出
屯劄礮頭羊烏潭二處劫擄男婦多人勒贖等情臣復嚴檄嶺東
守道臣楊鴻及惠州府並施王政與潮州叅將林宏各督官鄉兵
禁絕接濟刻期撲滅去後十一月十四日又據潮漳副總兵鄭芝
龍呈報賊首孔志等百餘夥在於雲霄官埤據仔林等處見吊二
匠在山造銃又有賊黃天台等俱在官津橋招募入夥往來漳浦
平和詔安饒平交界傳言欲劫饒平等語轉報到臣隨即牌行惠
潮嶺東二道移會潮惠叅將并行府縣嚴督官兵隄防遇有蠢動
合兵撲滅仍申飭保甲練總團練鄉兵守望相助協力拏究去後
十二月十一日後據各路道將續報擒斬捷功到臣又經會牌按
臣督行道將嚴率官鄉兵務要協力窮追前賊盡行撲滅仍牌行

惠潮道移漳南道合力并勦以絕根株不得各分畛域任賊潛遁
致復滋蔓見獲各賊審明招解正法仍動贖餉帑格給賞示勸被
擄難民行令釋放外該臣看得粵東惠潮地方山谷盤曲險于鳥
道伏莽之戎不時竊發臣撫粵以來十年有黃塘之勦十一年有
潮屬之勦皆一起一撲散不逾時而茲又有惠潮出掠之氛並芝
龍具報閩粵交界謀舉之寇也臣飛檄督勦同按臣決策從事幸
按臣李雲鴻巡方所過威望懾乎兵弁振揚惠潮二叅將統官兵
四路截捕兇賊披靡散逸俘馘纍纍奪回被擄難民以百餘名口
計可謂兵聲迅捷而豺狼屏息矣皆按臣認真慷慨謀斷兼資先
機指縱克捷如券真塞洪流于初穴撲燎火于始然功在焦頭爛
額之上矣若潮州叅將林宏惠州叅將施王政無萌不斬有警卽
弭足稱干板之任潮州府知府聶文麟推官王鼎鉉不負芻牧之

司把哨蕭龍許嘉法等除臣一面獎賞鼓激外以上雖各地方官應盡職業然不敢不一并及之以作其氣也至鄭芝龍所報招安饒平賊首等伺人掠食得隙卽逞閩中道將必蚤有銷弭而臣業檄道臣移會漳南道並催林宏施王政戮力窮捕務期殲厥根株以靖地方不敢滋萌芽而尋斧柯也謹會同巡按廣東監察御史李雲鴻具題伏祈敕下該部查覈施行謹題請旨崇禎十二年十二月十五日題奉 旨

糾劾不職有司官員以備考察疏

題爲糾劾不職有司官員以備考察事竊得粵吏界在天末風氣頽詭臣之議其上者亦旣格套盡破而糾治不遺餘力矣時值大計復取三年之官而彙覈之必使不肖窮于無所容而後官方從此振揚也憶臣備員吏省時與聞甲戌之計曾條陳天下撫按不

許以劣轉處分官員塞責不許寬甲榜而苛鄉貢經明旨申飭豈臣今日察吏而敢忘之乎亦惟矢公矢慎盟諸天日凡掩飾窮于去後不敢以大力者之優遷而漏吞舟採訪得于民間不敢以見在者之情面而索破甑總期徹底綜核取其害吾民者誅鋤必力以佐皇上式序之典而已謹據司道開報與聞見真確者得二十人爲皇上陳之計開韶州府曲江縣陞任舉人知縣潘復敏一凡報地方水戶鹽商之類本官皆委其事于衙官屢報屢更衙役得以行其貪婪小民受害一聽信衙役縣堂之上狐鼠叢神卽該縣佐貳官不敢犯其氣燄一素以興作見能其木石之費皆罰之民間甚至有罰及十餘金而鬻產破家以償者雖極貧無敢抗延一以申明保甲親詣各鄉不能自減騶從致使民間騷擾且多焚索費用在在苦之一本縣報充地方或係上首報代或係見年僉報

擇其可騙者開名報之一被其報多費數十金營脫乃更報一人甚至累及孤寡之家一時騷然或有告府審免者其不告而受累者含冤無限一素性疎莽見事卽發不一致詳故衙役輩乘而爲之雲霧如求示不應給者亦給之告娣不應批者亦批之或以空白紙求印亦印給之止知營私不顧民害此一官者賊私狼藉志趣卑污漁獵到處無餘剝削幾于及髓旣沸騰于衆口應痛傲夫官邪韶州府陞任舉人推官陳願達一本官初管浚光廠稅務復奉委查盤乃以稅務托謝巡簡令衙役同其事又以子與壻監之剝商無厭以致商人憤告其詞內所開衙役及相公等名皆刑館人也初時推爲詭名未出後竟以其事移之趙通判名下實爲李代桃僵衆共切齒一樂昌初聞警報本官奉委查督官兵比到縣官兵已出庾嶺去矣本官乃于近城之處每門令出一人各製包

巾執一器械卽歸報選有鄉兵數百頗自矜功後該縣委練總領往庾嶺爲官兵助及到彼處聞賊爭潰致官兵爲之氣靡本官事虛張毫無實著如此一本官不防閑內衙致干與外事卽如府縣考試薦名皆出自內衙所開大屬染指本官猶稱代人轉送一味用術欺人一本官情實叵測待屬官下僚有時而爲之吹毛旋有時而示以噓植其顛倒播弄之術一惟罔利傾險極矣此一官者污穢著聲狡獪成性旣虧操守以玷已復設機械以陷人刑廳法體爲之掃地矣以上二官所當昭貪例革職爲民者也雷州府海康縣陞任進士知縣陳燧一素性嗜酒成病每三四月不出堂皂快帶到應審人犯不問大小事發姜主簿代審罰贖便是了局一信用衙蠹楊欽陳古鄭貴等凡應審人犯悉聽門子擇差楊欽等拘拏任其嚇索見今楊欽等訪拏未結一前任林知縣軫恤窮

民夫馬之苦有庫貯銀三百兩詳議買田收租取花利克雇夫馬
本官到任未幾將前項買穀取息派累城內居民每年開報夫頭
馬戶富者賣免貧者當差一本官票取舖行葛布等件價多短少
迨陞任起程取討尙有全不給發者各舖行告給案據一本官於
崇禎十一年五月聞報陞任罔顧功令嚴凜畱戀不去囑士民假
以公呈保畱候新任交代因院道不允其請至九月方行此一官
者昏庸暮氣潦倒殘軀賄利薰心豺狼作祟合邑騷然阻詈不堪
再辱民社矣瓊州府感恩縣見任舉人知縣鍾麟郊一感恩有山
各毛包錦其地舊聞產金奉禁不敢私開近有金頭王朝良私自
挖開又造本縣告示責令承稅及至地方符放謙等告發本官不
能正法反多方護庇又庫內有金一錠被庫役抵換及至查盤摘
發本官但令庫役唯唯認完全無懲創一感恩壤地福小乃有積

年門子王賢書手吳英快手何明莊德陸鳴球結黨五人通縣有
遊奕五虎之謠本官不能正法怯懦可知一本官署崖州印務一
年凡遇監旗激變二次皆爲皂快周章毛鸞謝元等通同造訪詐
嚇良民以致里排黎惟順王家爵陳必秀等闕然變起橫木塞路
以拒官兵本官不能正法又不申請一任自起自散全無控禦一
爲樂安營兵搶掠鹽布以致生員林魁山陳策等群起爲難本官
但閉城自固卒致鄉兵鬪死本官匿不申報一崖州戶吏陳圖南
與庫書符曜交通作弊將錢糧銀虛出通關及私相假借圖利等
弊本官不能覺察遂來穿鼻之疑一上年黎賊射死鄭巡簡雖係
樂安營守備陳瑚信地亦在該州邦域之中乃符順道等緝獲黎
賊十四人本官止將三人解府尙九人淹禁州監今已半載卽府
票屢催不解亦不申明所以不解之故置人命生死虛實於度外

凡事優柔可知此一官者全無振刷一味欺蒙任狐鼠縱橫歛怨
爲德而土黎之交鼓譟失事屢見岌岌且釀禍矣不止官箴之玷
也廉州府陞任舉人推官車應兆一在城孔四潘二賭博本官公
出其子三相公車橋連盜父職權票拏送監半月各詐銀二十兩
憑差潘太付送乃釋合街通知一東莞客黃用帶有貲本車公子
橋連圖騙無繇遂通伊腹親抽豐容相公過黃用宅邊當內眷洩
溺致罵遽誣黃用搶銀五十兩諸稟差廖恩吳志拏禁黑獄無奈
被詐銀五十五兩釋命鍾客付交證一車橋連愛慕梁斗台閨女
梁氏年十七歲姿色託呂門子用賄鑽通夜夜出衙奸宿後被項
仁卿拏獲知是車推官三相公驚懼放逃回衙禍移呂門子被斗
台告府車推官回來知事急上堂推擔呂門子行奸止責呂門子
二十板責拏奸項仁卿二十板台女亦責三十板通郡周知一通

縣土書舊例一里一名今本官掌印每里添至五六名每名局銀
五兩止存一名應役差人周禮等戶房吏李顯春繳進一發傾錢
糧每封五十兩止發四十八兩傾匠家家舍冤罄賠一巡簡吳昌
鼎奉文驅逐赴院告狀批行查報本官受其丫頭夏妹一口始具
文回復通郡皆知此一官者坊表盡裂縱子作奸以致淫污醜聲
播滿廉海辱衣冠而羞士類李官中之不肖者以上三官所當炤
不謹例冠帶閑住者也肇慶府開建縣見任恩貢知縣袁嘉命一
本官賦性疎懶終日靜坐一切事件無論緩急槩束高閣不理以
致事多廢弛訟牒不清一本縣鹽船經過每船納銀三錢克餉今
不論商船民船一槩徵收俱被巡江把水侵欺本官亦有染指一
本官私衙日用設立南街保長荅應火柴北街保長荅應蔬菜豆
麥經年並未給價各保長證一本縣西司吏唐大相鑽管庫務二

年竟不點替大相共筭折銀六百兩本官失于覺察按院考察方
行監追至今尚未補明一本官堂規不立每坐堂時書吏門皂一
槩擁擠致有滿堂知縣之謹一庫吏唐大相積年作弊害人本官
反行任思合縣取怨一上司行提人犯本官每聽承法房吏梁子
錫誑稟延縱竟不拘解此一官者一心無主視聽憑人致城社之
奸魚肉鄉里其一役闖茸之氣策之不靈提之不起所當炤罷輒
例冠帶閑住者也高州府陞任舉人知府姚繼舜一崇禎八年四
月內失主黎日以盜劫擄殺控院賊犯馮瑞吾黃鳳陽潘心田等
該府數載不結馮瑞吾繫獄身斃止獲鳳陽一人該府竟不收監
任棍周維保出受賄縱逃詳申改批梧州府以圖蒙混一電白縣
民麥惟敬以殺男事情告葛前院批府人命重情自當早審本官
拘獲被犯林君俊林子化林躋魁林克志林暢林盈俊林守桂林

萬昌等繫監纍纍不訊不結致株連斃獄一本官昏庸因循凡庫
銀收支不却常例蔡秋芳丘茂槐柯鍾等寅夜餽送一本官耳輒
縱容下役需索援例納監張日昂梁天森等或報或免批行不一
日昂等五六名俱被詐索怨罵一本官事不果斷衷有濡染被惡
宦陳鑑挾持忤辱賓館咀罵大失官體此一官者日暮途窮志頽
識短奸宄因之窟穴耳目大欠靈通所當炤老疾例勒令致仕者
也惠州府長寧縣丁憂舉人知縣陳國禎一縱容庫吏陳廷贊那
借庫銀一百八十兩龍國瑞那借庫銀一百五十二兩胡志甲那
借庫銀四百一十三兩通同瞞隱誤稱民欠一英德龍門兩縣割
圖奉有旨行竟不能招徠收附紛紛丈量協濟私論以致頑民抗
拒尙未承役一該縣于各排年外再設見年五人每縣中大小事
務夫馬出入俱要見年料理見年計無所出每正糧一兩外再派

幫貼五見年證一鐵爐九座本官每爐每年私收公堂銀不等爐
商陳李茂等與工房書手梁真證一本官居官毫無法體河源縣
江生員統錫徒千餘白晝持刃殺入城將譚春元房屋焚劫妻女
凌辱本官坐視不救不報譚春元告證一本官往連平州修城將
官田私賣借名修城又不堅實今州城盡數崩陷一長寧儒學每
年額徵季考銀十二兩本官在任七年未季考一次此銀不知作
何使用通學鍾鼎壽等證此一官者才似恢張衷多黠染任庫吏
借銀而錢糧紊置見年夫馬而里甲疲物議久騰官箴大失雷州
府徐聞縣見任進士知縣吳國斗一巡方人徐聞境接有合縣士
民告退田地叩祈另招承佃詞狀查該縣以前錢糧積逋本縣一
以法振然用人未當追呼肆害百姓不堪大失子民之道一納監
一事該縣應納二名本官票差廿元柯賢等以幫監爲名拘掣浮

民嚇詐至一浮民費三五十金者合縣浮民蘇仁淵等共費三千
餘兩一徐聞陋習舊有無名票有小票皆直堂吏串衙棍爲之者
票出片紙書名勒索銀賄銷繳有王翰串廿元等發票勒陳堯道
鄧元芳等數十家本官不能禁革一私稅有禁廿元等同遊棍劉
奇會馮振濱等稟稱克餉准批執抽海船檳榔糖菓紅花等項稅
銀分肥以千計本官不加清理一夫馬騷擾禁嚴本官凡接應過
往以衙棍殷雄包當馬頭科派富民夫馬幫費五百餘兩郭義等
證一本官聽信衙役廿元爲之起號送扁大失官體合縣皆知一
本官喜于奉迎縣中豪惡招搖起祠濫費民財畧不禁止此一官
者才足濟事而出之以躁衷實有染而濟之以苛狐鼠縱橫人心
離散境內之怨謗有不堪聞見者高州府見任恩貢通判董其仕
一署石城篆半載陳知縣失事被參正在候審乃蠹犯勞大璋與

欽犯林瑜皆首惡也林瑜脫逃已經本府嚴行原籍拏到繫監而大璋積惡蒙查盤開其訪跡解院刑責發監竟聽棍黨潘材張達明保出致大璋遠遁無踪見詳未結一積役丘劉呂梁因電白民鄧彥高以錢債鳴廳原差丘紀卽將被犯李余華鎖挾銀二兩又行重索不遂丘劉大肆兇橫反自破頭聳廳添差呂梁協嚇要銀十三兩虐焰更熾致余華冤憤告按院批府提審一署印化州遇黜惡陳鑑不能剛柔互用致席尙未煖召釁紛紜雖本惡鋤究在卷而成心未化事多牽滯如石城劫賊株連不同宗之陳有忠幼犯黃亞石等經府審豁噴有煩言一帶署府篆時陳鑑在監賄囑朋黨生員十餘名假公求保本官遷怒于衆不與爲禮致諸生鼓衆挿血狂譁一石城旗軍素多怠惰欲加整頓須善調理署事初突然上城查點先期未行曉諭一旦軍士不齊將見在軍隊斥責

衆心不服幾于鼓譟一本官委署石城刁俗未革悍棍愈增按院巡歷往回控狀紛紛大約皆騷擾之衙蠹爲奸誣盜之良民受抑原狀可據此一官者刻薄之性乖戾之行每縱恣以用刑致軍民之含怨而騷擾地方則多愆之爲累也潮州府澄海縣見任舉人知縣方聞讚一本縣海通閩船凡閩商入境糴穀只憑吏林日杰書手張端范出票差查每船得銀二十兩十兩不等方許出海一本官聽信積書楊武乘生員楊標甲告殺姪命楊武指騙余孚衷銀八十兩又謝禮銀三十兩余孚衷證一本官聽信楊武乘考較生童串同楊鍾藍弄權每名前列者騙銀三兩五兩不等本官隨其術中去取一憑書役一本官徵收錢糧出入漫無稽察以致衙役每兩外加一錢官取三分衙役烹取七分通縣共怨一本官因上司票行納監事例聽積書張瑞寰楊武妄報殷戶出票拘拏以

致二書弄權願納者索花紅十兩二十兩不等不願納者得五六
十兩不等即稟縣官銷票合縣駭異此一官者營營在念殊乏潔
已之操而任匪庇奸境內之怨聲沸起殆掩耳偷鈴者乎以上四
官所當炤浮躁例重加降調者也廣州府新寧縣見任舉人知縣
余應郊一初任新寧京債逼索輒向富戶余耀恩等求貸多騰物
議一奉文召納監生先報大戶鄭季直余清玉等復聽胥役余應
明黃色奎趙門子朦稟營免致有放富僉貧之病民情沸沸一申
上文移多欠稟密聽憑吏書朦混往往違式以致煩滋批駁一性
多躁動民間詞訟或有隨其喜怒科斷輿情不協嘖嘖有言此一
官者肆情輕舉未免恃才顛倒之行偏聽生奸閭里騷然不靖失
豈弟之政矣潮州府鎮平縣見任舉人知縣胡會賓一鎮平新建
縣治各衙門皆依山麓本官妄信風水謬以前縣二令俱不善終

遂議更改科派里通錢糧強督兵民助工勞民傷財一本官恃已
膂力每着儒巾道袍匹馬出城梭緝山盜殊失觀瞻一本官查點
保甲拏平民張滿子鍾二子魯文興鄧福員等誤認為盜無失主
無告發擬斬詳道蒙批審豁存案一本縣新創田糧分自程平緣
新撥民戶不便輸糧本官差役下鄉督催騷擾雞犬不寧一本官
性剛量淺疾惡太甚每與把總林栢角口以致成仇互申案證一
本官始甚沽名作事張皇無序迨意氣一衰遂成弩末偃臥衙齋
庶務不理此一官者有振刷之心寬嚴不中窾節遂使物情囂然
亦其經濟之無術乎以上二官所當炤浮躁例量行調懲者也肇
慶府恩平縣見任舉人知縣黃扉一賊劫監生林如販賣貢葛四
十車每車一百疋值價千餘有黃達常報知差撫程吳茂桂通同
捕官李信德帶哨官方惟熊接獲賊布私自賣放不報本官不究

捕盜廳行查案據一賊先年劫舊驛差吳茂桂帶徒丁數十餘人捕賊前至陽春乘機劫掠黎子玉子玉赴院告爲三酷抄殺事批府行提屢催本官不卽解審任其買息躲避一恩平原設白蒙屯巡司官一員保固一方奈山林險阻孤城難守衆排楊德等祖置有田米五石三斗耕兵三十六名年收租穀克作兵糧載在誌書以杜勢占有陳一貫陳耀圖等侵占奉旨查核屯田不吐致廢城守十排謝相等上告批審賄吏鄧國器區渭不勘不審憲案沉閣十排等證一本官理訟俱聽信吏胥蒙蔽有生員馮雨金馮中譚仕存明買馮安國印岡田稅過割無異被蔡可索吞不遂假姪上登名賄吏區渭楊遇泰陰行主持將田曲斷原價一百四十餘兩只斷一半田遭謀奪通學不平團呈在縣付之不理一捕官不奉上文私自下鄉點編排門索取冊錢騷然不寧至有人命賊情行

委查擾外議囂騰亦不覺察一撫徭吳茂桂以加銜守備名色出入金帶黃傘侵官害民鑽營直堂不時委用有耆民鄭勳成爲墳山事被茂桂踏勘詐局銀兩本官爲之蔽護此一官者柄多旁落衷有沾濡商民軍狼交騰不理之口其亦土木而衣冠矣廣州府從化縣見任舉人知縣蔣朝陽一般侯周以奸情控縣差役葉逢源指詐被告黃家玉銀三十兩曲稟本縣免罪見案可證一該縣考取童生有鄉親胡相公封收鄧龍銀兩包取案首入學後本童控證一兵房書手鄧翹每年科派每甲免點丁口銀二兩本官未能覺察一本官差譚標葉逢源拘拏鄧太林陳谷等各役以索詐不遂致死谷男見告案證此一官者碌碌無能借權左右不免有穿鼻之誣盜舞于衢民怨于野廣州府新安縣見任舉人知縣彭允年一本官初任頗知自愛後以任用戶吏陸榮秋堂書黃鵬劉

俊等以致指詐公行民漸不服一本官聽吏陸榮秋左稟下鄉催督舊糧致各里排科歛供應保長劉萬勝等證一本官未能察奸致衙役黃鵬劉俊陸榮秋各因事需索防閑何在一本官以奉文行取鹹魚散給官兵遂科及大小漁船蛋戶陳邦賢等各有煩言此一官者庸冗之氣昏暗之心居官無片長可指而騷擾需索漸有煩言大負民社之寄高州府電白縣陞任舉人知縣周旦一本官柔懦不振如錢糧比卯一節任從生員出頭包攬糧餉逋負不完奉上急催則那借應解庫藏不清一本官馭下不嚴卽獄禁之地漫不關心禁卒疎懶致重犯謝嘉璋越獄偷盜梁禮家財脫逃一本官才局疎庸幹理不周凡奉上行一應詞詳牌案查盤罪贖任從吏書沉閣叠催不應一本官崇禎十一年內正月起五月止大賊團聚行劫被害甚多最慘惡者殺劫陳本富母周氏皆胡

奇傑李槐李毓熙呂亞二譚汝德李有初何良聰詹秉光等勾通陽春大賊李海宇爲首其李槐爲巨窩毓熙爲驍賊父子俱已獲禁在縣乃被槐壻陳達朝賄通衙蠹謝陞陳傑等保出廳去俱經本府宋同知審實招詳此一官者操守無可指摘而才具庸常境內多叢脞之狀課吏以績需才也本官負職掌多矣潮州府普寧縣見任選貢知縣張瞻韓一本縣穀船商人販糴者灣泊河下黃完五董和鑽謀差票託名查覈闖截索騙百商被害一普寧陋規十四里通每遇年暮卽辦本縣家火衙料以新易舊本官槩令折銀免辦每歲約有一百餘兩一本官徵收錢糧專任吏書櫃頭分外需索里排多怨一本官開掘城河票着六十四寨地方各取鄉夫三十名黃完五等私索鄉夫每名銀二分免役一日無銀者供役本官漫無稽察此一官者事多踰閑惠無實政以需索之使四

出致商民之謗橫興則才識限之耳潮州府平遠縣見任舉人知縣胡有英一縱權吏魯上達門子藍玉計串把總魯應元鑽票入山封商人餉爐騙詐得韓淳蕭沐溪等銀一百兩每人各得三十餘兩本官不行查究一禮房蠹書王珍民壯高魁窺林香妻死指稱人命勒詐林香銀八十兩二役各分四十兩本官知而不問一本官利典吏吳允蕃歲時送禮縱令擅受民詞虐害百姓通邑共憤此一官者處已無剛嚴之氣馭下有委轡之譏譬彼鉛刀以之迎盤錯則卷刃矣可謂才不及格以上六官所當炤不及例分別降調者也瓊州府萬州見任進士知州張璣一本官理訟過于苛求以致狂生李承範承輅當庭侮辱趕至明倫堂悍然犯上本生雖經究黜正法然亦本官處置失宜以故士心多有不服一本官賦性多執恃氣凌人催徵調劑失宜輪輓益緩故前因九年遼餉

未完奉文叅革後始完報開復則才之濡滯可見此一官者操持極謹性質迂疎既催科之政見拙復寬猛之施失宜固不能使士民帖然無議者所當炤不及例議降改教以全器使者也以上各官皆臣三載內畱心物色既觀其言貌復驗其行事既考其官評復察之輿論不肯任已亦罔敢徇人兢兢乎甄別必嚴而糾彈如額矣一時另疏特參見任府佐唐之相袁觀光進士知縣李玄皆大計中人也但期祛害務盡有聞必糾以副朝廷澄清之意激遐方委靡之習不自知其按劄過嚴而汰治之逾額也伏祈敕下該部再加覆議如果臣言不謬將潘復敏等分別炤例處治庶創懲嚴而人心爲之悚惕矣謹題請旨崇禎十二年十月初一日題十二月十日奉 旨吏部知道

題畱道臣疏

題爲重地道臣得人懇乞聖明加銜久任以奠巖疆事竊嶺西兵巡道居臣鎮城之下地當東西兩粵咽喉關係肇高二郡保障凡查核糧餉修理船器訓練軍兵消弭盜賊至近奉聖旨督率修練儲備事之無鉅無細悉賴該道整頓而彈壓之茲該道僉事員起宗心清似水力定如山卓然經文緯武之才偉矣投大肩宏之品計自去冬受事一應修城清戎造船繕器事事綜覈必親時時隄防曲到數月來所拮据釐飭純是忠君愛國之忱察吏安民之念頗使嶺以西山無拔木海不揚波皆其奏效之速也當此諸務就理人心攸歸正宜久任以觀化成乃查本官先任充西丁艱合之今任資俸已將及瓜竊慮一旦陞轉別省使本官之宏施未竟而嶺西之重地難支誠非封疆之利耳是用不得不援加銜成例會同巡按廣東監察御史李雲鴻合詞上請益粵東山海多事一

官之除非數月不能到自前任陶崇道去後時近一年方得該道之任若該道未數月而他陞則粵之失人罔應急需又可知也伏祈敕下吏部再加酌議如果臣等所言不謬即將本官加以相應職銜仍管嶺西兵巡道事庶賢能久于展布而吏治民生均有攸賴矣謹題請旨崇禎十三年閏正月十五日題三月二十八日奉旨吏部知道

特糾賄遺有司以肅法紀疏

題爲特糾賄遺有司以肅法紀事崇禎十三年閏正月十五日據廣東分巡嶺西道僉事員起宗揭稱職待罪嶺西雖謏劣不能佐風紀而矢以察吏安民四字爲要領本日早堂廣寧縣知縣王時英送童生考試來謁袖出一手本職以爲必地方緊要事也接之則上開本草綱目一部美髯丹一罇人參一斤紫檀文具一架職

嚴告之日本道從來與屬官語不及私此禮胡爲乎來哉夫藥不
達不膏無所用之人參此處絕少何從得此一斤且參一兩值銀
五兩也而時英復曰此非參也乃折參也職于是不覺爲髮指變
色而叱之出矣本官旣身爲不肖且以不肖待本道計所代之物
皆廣寧百姓之財也巧取以助結納而治狀大槩可見矣本道不
敢不以法自律不敢不令法行自近等因到臣臣惟皇上整齊吏
治首疾賂遺若在屬官更干憲紀益有司賄進怙上剥民方面餌
金庇貪辱法茲道臣冒起宗發王時英參銀一事咄咄驚人何物
隸僚公行覬獻此在該道破面斥私允副風紀之任在時英攫金
行媚大犯營結之條若不從重提究則不廉何誅不法何愧上下
之防決裂幾盡矣本官繩維不飭劣狀定多按臣復命在卽當細
行訪糾惟是本年大典漏此婪官雖云司道失關臣亦難辭疎昧

卽在萬里不敢蒙飾謹會同巡按廣東監察御史李雲鴻具題伏
祈敕部議處施行謹題請旨崇禎十三年閏正月十六日題三月
二十八日奉 旨王時英着該部議處

就近調補要地官員疏

題爲要郡缺官謹議就近酌調仰祈聖明俯賜陞補以重海防事
崇禎十三年閏正月初十日據廣東布政使司呈奉臣會牌炤得
肇慶府當兩粵之要區爲鎮城之重地軍民錯處水陸交衝奸宄
竊發綏戢爲難況今知府與同知並缺推官又以察處通判奉裁
管糧止一督捕見任篆務乏員政務軍機成廢閣況今番大計
別郡嚴經接糾什缺三四卽借才兼攝亦苦乏人當茲山海多警
春汛屆期所藉督修戰船稽核兵哨以資守禦者海防一官更爲
喫緊相應議補萬難姑緩會同巡按李御史牌仰本司卽便移會

臬司速于各郡佐州守中查議才守俱優官一員或調任或陞補速具繇通詳兩院以憑會題等因奉此該本司署印糧儲道叅議黃日昌會同按察司按察使王夢錫查報等因呈詳到臣該臣會同巡按廣東監察御史李雲鴻看得肇慶一郡之在兩粵也勢扼東西之衝喉縮山海之要而鎮兵數千萃於其地軍民錯雜彈治匪易若海防同知一官出固春冬兩汛入辦軍旅急需誠一日不可無人而今缺數月矣知府陞任未除通判推官一裁一處孑然捕倖方弭盜之未遑豈兼攝之能辦欲借署別郡則廣州知府余自怡故矣除新裁與計處廳官止一考選將行之孫襄也雷府知府同知未任矣推官新故是合郡無一人也瓊廉止一府一廳而兩地州縣無人自攝不能何能遠借高州府一守二廳而高屬羅定州縣半缺則又矜肘之徬徨矣于是肇慶府在臣鎮下者各蒙

塵封戎務委頓當地方多事奸宄竊發之日臣等所以不寒而慄也茲據二司查報連州知州王立準久負威廉之望夙嫻軍旅之司會勦楚寇建有懋功况俸已及期若陞補海防同知必克厥任使且朝推夕任以濟肇府空署而資海汛之防莫便于此者方今功令森嚴臣題補一官不勝徘徊瞻顧無奈計後乏人萬不得已始揀擇請補况粵遠萬里取才于近與陞任于遠而徐期其來者功相萬也至肇慶廣州二守皆劇地大郡非精明甲科不足勝其任而愉快所當一併祈補以重遐疆者也伏祈敕下該部查議如果臣等所言不謬將王立準陞補肇慶府同知其廣肇二守一并速除甲科前來則粵疆幸甚臣等幸甚謹題請旨崇禎十三年閏正月十一日題三月二十八日奉 旨該部知道

國

